

67a

71

72

73

74

75

76

77

78

h

79

80

81



X

Sammelband

Cf
/39



Pugna sum finem cum iacet hostis habet



4
Caluinischer Hammerschlag/

Das ist:



4
A Irzer einfeltiger
bericht/das der Sacramentshender/oder
Caluinischer Schwarm ein erkandter/vñ bekandter
Irrthumb sey / vnd dauon wegen von allen rechtschaffenen
trewen Predigern öffentlich zu straffen/ auch allen
frommen Christen/als den Teufel selbst/
zu fliehen vnd zu meiden.

**Wider des Grundmans Sacramentio-
risch Buch/ Daraus zusehen/ob Lutherus vnd Phi-
lippus nicht wider die Caluinisten vñ Sacramentshender geschrie-
ben/vñ ire falsche Lere verworffen vnd verdamnet haben.**
Durch

M. MARTINVM FORCHEIMERVM
Regiomontanum Francum.



Gedruckt zu Christlingen.

Caluinischer Hammerschlag.

I.

Christlich ist gewiß/ das/ wer das Wort Gottes des heiligen Geistes Wort / oder wie einer aus den *Patribus* geredet / ein Epistel Gottes ist an das Menschliche Geschlecht geschrieben/ verkleinert/ verdrehet/ verleugnet vnd umbkeret/ der müsse gewißlich nicht von Gott / sondern vom Teufel/ vnd mit den aller gröblichsten Schwärmeren / erkandten vnd bekandten Irrthumen eingenommen sein / Das sage ich/ ist gewiß/ vnd niemand/ der nur ein Christlich herke hat/ kans leugnen. Nu aber verkleinern/ verdrehen/ verleugnen vnd verkeren die Schwärmer das wort Gottes gar schendlich/ inmassen solches aus iren eigenen Büchern Augenscheinlich zu erschen.

Denn erstlich verkleinern sie Gottes Wort vnd heilige Schriffe ganz auff Schwärmerische art / in dem sie das wort vnd den heiligen Geist von einander scheiden / vnd alle Krafft / Wirkung / Leben / vnd Seligkeit dem Predigampft enziehen. Denn also schreibet Zwinglius wider Straus/ vnd in *Negefi* wider D. Lutherum / Das Mündliche vnd eusserliche gepredigte Wort Gottes / kan dem innerlichen Menschen nichts dienstlich sein/ im in etwas zu helfen / oder den Glauben zu mehren/ durch des Predigers wort kan mit nichten die Zuversicht des Hersens gewircket / viel weniger das jenige so darinnen versprochen/ gegeben werden/ etc. Hinwider sprechen unsere *Kindlein*/ vnd wir mit ihnen in vnserm Catechismo: Ich glaube das der H. Geist mich durchs Euangelium beruffen/ mit seinen Gaben erleuchtet/ in rechtem glauben geheiligt vñ erhalten.

Das ist eben das/ das der heilige Paulus spricht: Das Euangelium / das ist/ des Predigers wort/ ist ein Krafft Gottes zur Seligkeit/ allen die daran glauben / Rom. 1. Vnd Glaube kömpt aus dem Gehör/ Rom. 10. *Oecolampadius*

A. ij.

von

Caluinischer Hammerschlag.

von Worten des Abendmals schreibt: Die Sünde werde nicht vergeben durch das Wort der Absolution / wie auch in der Tauffe vnd Gebrauch des heiligen Abendmals solches nicht geschieht.

Dagegen sprechen unsere Kinderlein vnd wir im Catechismo von der Absolution: Der Herr sprach zu seinen Jüngern: Nemet hin den H. Geist / welchen jr die Sünde erlasset / dem sind sie erlassen. Von der Tauffe: Die Tauffe wirckt vergebung der sünden / erlöset vom Tode vñ Teufel / vnd gibt die ewige Seligkeit allen die es glauben / wie die Wort vñ Verheißung Gottes lauten. Vom Gebrauch des H. Abendmals. Was das Essen vnd Trinken im H. Sacrament vns nütze / Das zeigen vns diese Wort an: Für euch gegeben vnd vergossen zur vergebung der sünden / Nämlich das vns im Sacrament vergebung der Sünden / Leben vnd Seligkeit / durch solche Wort gegeben wird. Das ist eben das / das die Schrift sagt: 1. Von der Absolution / Matth. 16. Was ihr auff Erden binden werdet / das sol auch im Himmel gebunden werden. 2. Von der Tauffe / Tit. 3. Gott macht vns selig durch das Bad der Widergeburt. Vnd Marc. 16. Wer glaubet vnd getaufft wird / der wird selig. 3. Von dem H. Abendmal: Nehmet / esset / das ist mein Leib / der für euch gegeben wird / zur vergebung der Sünden.

Hieraus können die einfeltigen sehen / das freilich die Schwermir dem Wort Gottes ein grossen abbruch thun / vnd das beste Stück von vnserm Christenthumb / vnd vnserm lieben Catechismo wegrißten. Denn wir ja auff dieser Welt nichts höhers achten /
als

Caluinischer Hammerschlag.

als das selige wort Gottes/ Tauffe / Absolution / vnd heiliges Abendmal / als die Mittel / dadurch das Heil / das vns Christus mit seinem bitterm Leiden vnd Sterben am Stamme des Creuzes erworben / einem jeden vnter vns / von Gott dem H. Geist zu Haus vnd Hoff gebracht / vnd ganz eigen gemacht wird / So komen die Schwärmer daher / vnd achten diese grosse Schere gering / vnd schreien nur Geist / Geist / Geist / Wort / Tauffe / Absolution / Abendmal sollen nichts sein / da vns doch weder Geist noch Glaube / noch Vergebung der Sünden / Leben vnd Berechtigkeit kan gegeben werden / denn durchs Euangelium / das geprediget wird / vnd die heiligen hochwürdigen Sacrament / die nach Christi Ordnung ausgeheilet vnd genossen werden. Das ist eins.

Fürs ander / so verdrehen sie Gottes Wort gar lesterlich / in dem das sie die fürnehmsten Verheissungen Gottes / im alten Testament / vom Messia geben / nicht von Christo / sondern von andern vngereimpten / vnd den herrlichen Verheissungen ganz vngleichen sachen auslegen: Als das wir scho nur eins oder zwey Exempel sehen. Caluinus pag. 519. vber die Wort Esa. 61. DER Geist des HERRN ist vber mir / Darumb hat mich der HERR gesalbet / schreibet also: Gar vnbedachtsamer weise / werden diese wort des Propheten von den Auslegern der Schriffe auff Christum gezogen / da sie sich doch auff andere Propheten auch reimen. Dagegen lesen wir Luc. 4. Das Christus / da Er gen Nazareth in die Schul kommen / diese wort: Der Geist des HERRN ist bey mir / etc. selbst von sich ausgeleget / vnd besaget: Heut ist diese Schriffe erfüllet für ewren Ohren.

Matth. 9. stehet: Siehe dein König kömpt zu dir ein gerechter vnd Helffer. Von solchen Worten spricht Caluinus pag. 675. das sie *Nugatorie* vnd *friuole*, das ist / lügenhafftiger vnd schwachhafftiger weise von Christi Einreitung auff dem Esel vnd Füllen gen Jerusalem / dadurch Jüden vnd Heiden bedeutet / verstanden

Gäuinischer Hammerschlag.

standen werden / on d durch solch Geschwew werde der rechte verstand des Spruchs verkehret / vnd so viel zu wegen gebracht / das man der Weissagung nicht Glauben gibe. Lese der Einfaltige das Euangelium / so am ersten Sontag des Aduents in der Kirchen geprediget wird / so wird er befinden / das Mattheus der Propheten wort darauß deute. Welches diesem Schwermmer nach lügenhaffziger vnd schwerhaffziger weise ausgeleget wird.

Ach H E R R Jesu Christe sey vns gnedig / vnd straffe vns nicht vmb dieser gewlichen Gotteslesterung willen. Du hast ja selbst gesaget / Das nicht die Apostel / Sondern der Geist deines Himlischen Vaters durch sie geredet. Hat nu Mattheus die wort von Christo *frivole* vnd *nugatorid* / das ist / als ein Schwesker vnd Lügner von Christo verstanden. So muß je dein heiliger Geist ein solcher sein / wie er Mattheum nennet / wie du selbst sagest: Wer euch verachtet / der verachtet mich.

Ein Herr / das seinen H E R R N Jesum Christum liebet / vnd ehret / vnd selig zu werden begeret / das wird nicht allein vber solchen schrecklichen Reden also zornig / das ime die röhte vnter den Augen ausschlehet / Sondern auch dermassen betrübet vnd trawrig gemacht / das er vor leid vnd zorniger Liebe möchte vergehen. Ach ist doch je das so schrecklich / als wenn ein Mensch den H E R R N Christum ins Angesicht schlage / vnd spreche / Du loser Mann / Als wie *Blandrata* Christum ein Bepfischen Wechselbalck / vnd *Seruetus* die hochgelobte heilige Drenfaltigkeit *cerberum tricipitem*, ein Drenköpffigen Teuffel genennet. Ach welch Christlich Herr sollte nicht solche gewliche Lesterer als den Teuffel selbst fliehen vnd meiden. Verschon vnser O Gott / verschon vnser / vnd zeug vns nicht hin vnter den Gottlosen / vnd vnter den Vbgebetern / die freundlich reden mit iren Nehesten / vnd haben böses im Herzen / Gib jnen nach irer That / vnd nach irem bösen wesen / Gib jhnen nach den Werck irer Hende / Vergilt jnen / was sie verdient haben.

Nie

Caluinischer Hammer Schlag.

Hie köndet man ordentlich nach einander alle *promissiones* erzehlen/ vnd weisen/wie sie damit vmbgiengen / als das *Caluinus* schreibet/die Verheissung (Gen. 9. Es wird das Scepter von Juda/etc.) sey dunckel / vnd *in feruore coram, qui illius stranda gloriae Christi causa illam interpretati sunt de Messia.* Das ist/ in der hiez der jenigen/die Christi Ehre zu befördern von dem Messia / sie ausgeleget / sey etwas zu viel geschehen / Des gleichen das die wort Hos. 11. Ich rieß meinen Sohn aus Egypten / die der H. Mattheus ausdrücklich auff Christum deutet / werden zwar von Christo ausgeleget / *sed ab hominibus minus exercitatis in scripturis*, von Leuten / die in der Schrifte nicht geübet sind. Aber wer kan oder wil dem Teufel zu gefallen solche schreckliche dinge nur hören / da kein zweiffel ist / das auch die lieben Engelen im Himmel/derer viel tausend mal tausent für Christo stehen / vnd im dienen / vber solchen schrecklichen Reden frem HErrn Christo zu Ehren betrübe werden vnd ergrimmen / die Teufel aber in der Hellen lachen / tanzen / vnd dem HErrn Christo zu trotz ein kliplein schlagen/trogen vnd sprechen/Sihe da du Christus/noch dennoch lestern wir dich / du must vns dennoch dulden / das wir vnser Reich propagiren / vnd deines verstoren.

Hie solt auch angezeigt werden/wie *Caluinus* die aller schönsten Zeugnis der heiligen Schrifte von der Gottheit Christi verdrehet / vnd von Christo weggezogen auff seine Gauckeley. Aber dauon hat der fromme Gottselige Herr D. Johan. Mattheus / etwa Professor der heiligen Schrifte zu Wittenberg lengst die Einfeltigen Bericht. Das ist das ander.

Fürs dritte so leugnen sie auch Gottes Wort / vnd Lehrens stracks omb/wenn Gott spricht / Ja / so sprechen sie n in. Der HErr Christus spricht: Mir ist gegeben alle Gewalt im Himmel vnd auff Erden. So sprechen sie / Christo ist nicht gegeben aller Gewalt im Himmel vnd auff Erden / Sondern

1118

Schwimischer Hammerschlag.

nur ein Mittelgewalt/ein halb: Gewalt / als wie etwa ein *factor*.
(wie mans nennet) eines Guts nur halbe gewalt/desselben Herr
aber alle gewalt hat / oder / wie jenes Lestermaul sprach / Es sey
wie mit dem Bürgermeister / der habe wol gewalt / weil er im
Ampt sitze vnd regiere / aber er habe nicht macht zu thun / was er
wolle / sondern müsse erwarten / was ime von Hoff aus befohlen
werde. Doer (wie der grosse Man Herr D. Ch. mnicus Gotts
seliger Ir gleichnis meldet) *Sicut vir frigidus habet quidem pote-
statem, sed non potentiam.* Wenn Christus saget / Das ist
mein Leib der für euch gegeben wird / So sprechen sie / Es
ist nicht der Leib der für vns gegeben wird / sondern ein Zeichen
desselben / oder es ist der Leib / der mit dem Glauben muß verstan-
den werden.

Wenn Christus saget im Mattheo vnd Marco: Dieser
Kelch ist das newe Testament / So spricht Zwinglius / es
sein *nimis sicca verba*, gar zu Trostlose wort / da kein safft noch
Leben innen ist.

Wenn Christus im Luca spricht / *Poculum pro vobis effusum*.
Der Kelch der für euch vergossen wird / So sprich Pe-
za / es sey entweder *ex margine* nein geflicket / oder sey ein *mani-
festum solo ccephanes*. In Schulen gibt man sonst den Knaben
ein product / wenn sie *Solacismos* reissen / Ist sich zu verwundern /
das Peza an Luca solches auch nicht beweist.

Wenn Gottes Wort saget: Gott wil das alle Men-
schen selig werden / So sprechen die Vnsfliter nicht alle / sons-
der etliche.

Wenn Gottes wort saget: Die Tauff ist ein Bad der
Widergeburt / So sprechen diese Lestere / sie ist nicht ein Bad
der Widergeburt / sondern bedeut die Widergeburt / oder ist ein
Zeichen / das der Mensch zuvor / ehe er getaufft worden / wider ge-
boren vnd selig gewesen.

Wenn

Caluinischer Hammerschlag.

Wenn Gottes Wort spricht: Das Fleisch Christi machet lebendig / So sprechen die Schwärmer: Das Fleisch Christi ist kein nütz.

Wenn Gottes Wort sagt: Gott sind alle ding möglich. So sprechen sie: Gott sey mit aller seiner Allmacht nicht möglich / das der Leib Christi auff eine zeit in mehr denn an einem ort sey.

Wenn Gottes Wort sagt: Wer da sündigt / der ist aus dem Teufel / So sprechen die Sacramentschender / Wer da zum ewigen Leben verschien / ob er gleich Ehebruch und Todtschlag begehet / so ist er doch aus dem heiligen Geist / vnd es sey mit im / gleich wie mit einem vollen Mann / der in der Trunckheit zwar den rechten gebrauch der Vernunft verliere / folge drum nicht / das er der Vernunft beraubet sey.

In Summa / wer so trotzig ist / das er einmal Christum vnd sein Wort darff liegen heissen / der darff auch Wort / Lauff / Abendmal / Glauben / Christum / Gott / alles vbergeben / vnd an derselben stat zu den Arrianern / Nestorianern / Türcken / ja zum Teufel selbst sich begeben.

Wie vñthelst dich in Christlicher Leser? Ist der Caluinischen ihre Eere Heiligthumb / oder Teufels Werk vnd Gespötte? Da stehen ihre Bücher / darinnen findet man diese schreckliche ding alle / wiewol es dem Teufel hange thue / das man seine Perlen denen Leuten zu sehen gibt / die doch nicht sein / sondern Gottes sein sollen. Es redet je nicht der heilige Geist / sondern der Teufel durch diese Leute / denn der heilige Geist schlege sich nicht selbst im Maul / Er leugnet nicht seine eigene wort / Er lestert den Herrn Christum nicht: Darumb auch der hocheleuchte selige Man D. Luther / in massen in seinem Brieff an Jacobum Prostest zu sehen / zu Marpurg Anno 29. zu Zwingel vnd Oecolampadio gesage: Ir habt einen andern Geist / denn wir.

W

Über

Caluinischer Hammer Schlag.

Über welchen Worten sie ganz vnd gar entbrant/ so offte sie dieselben gehört. Also muß sich nu Gott von den Schwermur vertei-
nern/essen/ vnd vertilgden lassen/nicht anders als wenn der ki-
dige Teufel/für Got trete/ vnd speite im in sein heiliges Ange-
sichte/ oder als wenn Gott spreche: *Fiat*, Es werde/ Vnd der
Teufel steche Gott ein Mönchle/ vnd spreche: Pfuwan/psu dich.
Dafür vns Gott gnediglich behüte/ Amen.

II.

Es ist kein Zweifel/ das / welcher Mensch von
der Gerechtfertigung des armen Sünder wegnimpt der
Gerechtigkeit einigen grund/fürnehmste vrjach/vnd mit-
tel / dadurch wir zur Gerechtigkeit kommen sollen vnd müssen/
derselbe nimpt vnd stilt vns die Gerechtigkeit selbst. Das wir
also nichts in hr sein vnd bleiben/denn arme elende Sünder / ver-
lorne vnd verdampfte Menschen/ zeitlichem vnd ewigen Tod vns-
terworffen/vnd ist derwegen mit den schendlichsten erkandten vnd
bekandten Irrthumb eingekommen.

Das ist auch eine gewisse vnd warhafftige Rede: Als zum
Exempel: Wenn du woltest von einem grossen Potentaten ein
Gut gescheneckt haben / so vermöchtestu dasselbe dir noch deinen
Kindern zu gut nicht erlangen/denn du mußt haben 1. den grund/
das ist den Potentaten selbst. Denn wenn der gestorben were / so
würde dir all dein fürnehmen vnd hoffnung zu Wasser. 2. Muß-
tu haben den gnedigen willen des Potentaten gegen dir. Wenn
du den auch nicht haben köndtest / ob gleich der Potentat verhan-
den/so were es doch auch nicht. 3. Ja du mußt auch dencken auf
ein Mittel/wie du demselben Potentaten mögest beylommen/
er dich deiner bitt gewehren köndte. Eben also/wiltu für Gott ge-
recht vnd selig werden/ so mußt du haben einen Man/ der nicht todt
ist/sondern lebet/welcher ist Christus. Zum andern / mußt du haben
desselben Mannes herrlichen vnd gnedigen willen gegen dir/ das
Er dich wolle zu Gnaden annehmen / dir deine Sünde vergeben/
dich

Caluinischer Hammerschlag.

Dich gerecht vnd selig haben/vnd machen. Zum dritten/mustu haben die Mittel / die dich zum selben HErrn führen / als da sind Wort vnd Sacrament. Das ist also gewiß vnd warhafftig / das auch der Teufel selbst nicht leugnen darff.

Nu nehmen vns die Sacramentschwerm:er von vnser Gerechtigkeit weg der Gerechtigkeit / Grund/sarnempfte Ursach/vnd Mittel / dadurch wir zur Gerechtigkeit kommen sollen vnd müssen/in massen solchs aus iren Schrifften Augenscheinlich kan erwiesen werden. Denn erstlich nehmen vnd stelen sie vns den grund vnserer Gerechtigkeit/ Wer ist derselbe/ Niemand anders als vnser HErr Gott/vnd Bruder Jesus Christus. Wiltu gerecht werden/so mustu für allen dingen haben deinen lieben HErrn Christum. Denn einen ander Grund kan niemand legen / außer dem der geleget ist / welcher ist Jesus Christus/ 1. Co. 3. Es ist ein Gott vnd ein Mittler zwischen Gott vnd den Menschen/ Nemblich der Mensch Jesus Christus/ 1. Tim. 2. Vnd von diesem zeugen alle Propheten / dz durch seinen namen alle die an in glauben Vergebung der Sünden empfangen sollen. Dieser HErr Jesus Christus ist warer Gott von ewigkeit her / aus des Vaters Substanz vnd Wesen gezeuget / Liecht von dem Liecht / Gott von Gott / warhafftiger Gott von warhafftigem Gott/mit dem Vater vnd H. Geist in einerley Wesen/durch welchen alles geschaffen/in der zeit hat Er von der seligen Jungfraw Maria Menschliche Natur an sich genommen/ nach welcher Er nicht allein vnter Pontio Pilato gelitten / gecreuziget / gestorben vnd begraben worden / am dritten Tage wider auffgestanden von den Todten/ auffgefahren gen Himmel: Sondern auch sich gesetzt zur Rechten der Krafft Gottes / das ist / wie es die Augspurgische Confession herrlich erkleret / sitzet zur Rechten Gottes / das Er ewig herrsche vber alle Creaturen/vnd regiere /

Galunischer Hammerschlag.

Das Er alle so an ihn glauben / durch den Geist heilige / reinige /
stercke vnd tröste / ihnen auch Leben vnd allerley Güter vnd Gaben
ausstheile / vnd wider den Teufel / vnd wider die Sünde schütze
vnd schirme : Oder wie die Schrifft gewaltiglich dauon redet :
Er sitzet zur Rechten des Vaters / Das ist : Er ist ein
Herr vnser Herrscher / des Namen herrlich ist in al-
len Landen / Den Gott mit Ehren vnd Schmuck ge-
krönet / vnd zum Herrn gemacht hat ober seine Hen-
de werck / alles vnter seine Füße gethan / etc. Gewalt /
Ehre / vnd Reich gegeben / das in nu alle Vöcker /
Land vnd Zungen dienen sollen / vnd seine Gewalt
ewig ist / die nicht vergehet / Vnd sein Königreich hat
kein ende : Dem alle gewalt gegeben im Himmel vnd
auff Erden / auch macht das Gericht zu halten / dar-
umb das Er des Menschen Son ist / durch die rechte
Gottes erhöhet / zu einem Herrn vnd Christo ge-
macht / gesetzt zur Rechten Gottes im Himmel ober al-
le Fürstenthumb / Gewalt / Macht / Herrschafft / vnd
alles was genant mag werden / nicht allein in dieser
Welt / sondern auch in der zukünfftigen / Ober alle
Himmel auffgefahren / auff das Er alles erfüllet / wel-
cher ist zur Rechten Gottes in den Himmel gefahren /
vnd sind in vnterthan die Engel / vnd die Gewalti-
gen / vnd die kreffte / der die Himmel durchdrungen / hö-
her denn die Himmel worden. Einen solchen Herrn haben
wir an vnserm Bruder Jesu Christo / das nu in Christo Gott
vnd Mensch alles Allmechtig / herrlich / vnd gewaltig ist nach sei-
ner.

Caluinischer Hammer Schlag.

ner Gottheit von Natur/nach seiner Menschheit aus Gnaden der
Persönlichen Vereinigung. Und wer vns diesen vnsern HERN
Iesum Christum also fürbildet / weiset / dergl weiset vns auff den
rechten grund vnser Gerechtigkeit vnd Seligkeit.

Wer aber anders leret / es sey nur von seiner Gottheit oder
Menschheit/der ist nicht Christi diener/sondern des Teufels geburt/
die vns abschret von Christo zum Teufel / von Gerechtigkeit zur
Sünde / von dem ewigen Leben zur ewigen Verdammis. Denn
wir müssen entweder den ganzen Christum haben/oder haben gar
keinen/Allein mein / oder laß gar sein / In massen denn in Schu-
len recht gesage wird : *Qui errat in definitione errat in definito.*
Wer nicht weiß / was ein ding ist / der weiß das ding gar nicht.
Als ein Mensch ist eine Creatur Gottes/der Leib vnd Seele hat/
Weiß aber einer nichts wüßte vom Menschen/ denn nur den Leib/
der hette nicht einen rechten/ sondern keinen Menschen / denn ein
Leib allein ist kein Mensch.

Nu aber lassen vns die Schwärmer den HERN Christum
nicht also/wie Er ist / Sondern schreiben frey öffentlich / das Er
zwar warer Gott sey / aber nach der Menschlichen Natur sey Er
nicht Allmechtig/erfülle nicht alles / sey nicht bey vns bis an der
Welt ende / sey als warer Gott auff Erden/ im Himmel nur al-
lein warer Gott vnd Mensch/ regiere seine Kirche durch eine hal-
be gewalt/die nicht Gottes gewalt sey/könne noch wolle nicht mit
seinem Leibe auff Erden sein/wie newlich einer geschrieben: *Corpus
Christi in nos nihil agere, nec in animas nec in corpora nostra.* Der
Leib Christi wircke in vns nichts / weder in vnsern Seelen / noch
Leib. Und was dergleichen grausame Reden / derer bey ihnen
kein ende ist / gehöret vnd gelesen worden.

Dieweil denn die Schrifft vns auff einen solchen zerrennes-
ten/halbmechtigen/vnd geringschetigen Man nicht weiset/Son-
dern auff einen ewigen Allmechtigen / gewaltigen HERN: ist
leichtlich zu schließen / das sie vns nicht auff Christum / sondern

Caluinischer Hammerschlag.

auff einen andern Man weisen / vnd vns also des Grundes vnser Seligkeit berauben. Das ist vom Ersten.

Fürs ander/nehmen vnd stelen sie vns auch die fürnehmste vrsach vnserer Gerechtigkeit. Welches ist dieselbige? Das freundliche leutselige Herz / vnd die herrliche Barmherzigkeit des grossen Gottes vnd Christi gegen alle arme Sünder. Denn es jammert Gott in ewigkeit vnser Elend vbermassen / Er dacht an seine barmherzigkeit / vnd wolt vns helfen lassen. Das ist eben das / das die Schrift sazet: Also hat Gott die Welt geliebet / das Er seinen einzigen Sohn gab / auff dz alle die an in glauben / nicht verloren werden / sondern das ewige Leben haben. Was damit dieser Herr ja seine herrliche Liebe vñ Barmherzigkeit allen menschen aufferüze / vnd zu erkennen gebe / so lisset Er vñ in nicht mangeln / sondern thut solche hohe / grosse Werck / darüber wir vñ in ewigkeit zu freuen vnd trösten / vnd nicht Wunder / das ein Mensch für freuden darüber stirbe / vnd wider lebendig würde.

Denn 1. Ruffet Er alle zu sich vnd zur Busse / Matth. 11. Kompt her zu mir alle. Act. 17. Gott gebeut allen Menschen an allen orten Busse zu thun.

2. Schweret er bey seinem Leben vnd Göttlichen Namen / das Er nicht wolle des Sünders tod / sondern das er sich bekehre vnd lebe / Ezech. 33. vnd Eze. 18. wil Er nicht den tod *Morientis*. des sterbenden / das ist / des der in seinen Sünden stirbet vnd verdirbet.

3. Dreyet Er gar ernstlich vnd hefftig / Er wolle den tod *Morientis*. des der vmb seine Sünde willen verdampft wird / an den vñ trewen Predigern am Jüngsten tage rechnen / Ezech. 33. Gibet damit zu verstehen / das Er ja alle Menschen liebe / vnd gerne selig machen wolle. Dñ wenn ein Hirt sich an einen Wolff lehnet / so gibet er damit zu verstehen / das es im herrlich wehe thue / dz er im seine Scheffel ein fressen wil / oder schon gefressen hat. 4. Bei

Caluinischer Hammer Schlag.

4. Beklauct vnd beweinet er der Gottlosen vntergang / Ezechielis am 33. Ach warum wolt jr sterben jr vom Hause Israel. Luc. 19. weinet der Herr Christus vber die Stadt Jerusalem bitterlich. Vnd also weinet Er heutiges Tages noch vber vns / wenn wir dahin gehen / vnd vns zu im nicht bekehren: Gleich wie ein frommer Vater weinet / wenn sein ungehorsamer Son nicht wil gut thun / Oder wie Dauid vber seinen Son Absolon schrie: Mein Sohn Absolon / mein Son / mein Son Absolon / wolt Gott ich müste für dich sterben / O Absolon mein Son.

5. Bittet Er vns zu vnser Seligkeit / vnd zu dem ewigen Leben / 2. Corinth. 5. So bitten wir nun an Christi stat / lasset euch versöhnen. Ach Herr Gott wie sind das wort / wir haben Gott ja gröblich erzürnet / dz wir billich tag vnd nacht auff vnsern Sünden liegen solten / vnd ime es abbitten / so kömpt der trewe Herr vnd bittet vns ab / als wenn wir Gott weren / vnd Er ein stinckendes As / wie wir Menschen sind.

Das heist freilich / wie ein frommer Pater gesaget: Gott hat vns also lieb / als wenn sein Heil an vns gelegen were.

6. Sendet Er seines Herken werde Kron in die Welt / das Er für Alle / alle / alle Menschen leiden vnd sterben sol. Johannis am ersten Capitel: Siehe das ist Gottes Lamb / das der Welt Sünde tregt. Vnd Esa. 53. Der Herr warff aller vnser Sünde auff im. Vnd Petrus spricht / 2. Pet. 2. von den verdampften falschen Lehrern / das sie den Herrn verleugnen / der sie erkauft hat / die vber sich ein schnel Verdammnis führen werden.

7. Lasset Er allen Menschen solches seines Sons verdienst fürtragen im Wort vnd Sacrament / dauon drunden.

Wir

Caluinischer Hammerschlag.

Wer nu vns vnd alle Menschen auff einen solchen freundlichen/
Herzlichen/willigen/trewen/barmherzigen HErrn führt/der führt
vns recht an/vnd weiset vns die rechte Hauptursachen vnsere
Seeligkeit/ Nämlich die Gnade vnd Barmherzigkeit Gottes ge-
gen alle arme Sünder/wie wir singen: Es jammert dein barm-
herzigkeit/ vnsere Sünd vnd grosses Leid. Wer vns
aber dazu nicht weiset/sondern anderswo hin / der raubet vnd stilt
vns die Gerechtigkeit/man sage oder singe/ süsse oder sawer.

Nu führen vns die Caluinischen nicht zu solcher Gnade vns-
fers lieben Gottes gegen alle arme Sünder / Sondern reden gar
schrecklich vnd lesterlich davon: Als das sie schreiben: Gott hat
in seinem heimlichen Rath vnwandelbar beschlossen/vber den meis-
ten Theil der Menschen / das Er nicht wil das sie Busse thun /
sich zu Gott bekeren / dem Euangelio glauben / das Blut Christi
in sich zu gut komme / vnd sie selig werden/welche Er zur Verdams-
nis erschaffen/versehen / vnd verordnet hat

Wenn Christus spriche: Kompt alle zu mir / meinet Er
nur etliche / die Gott zum ewigen Leben nach seinem geheimen
Rath erschaffen.

Christus ist nicht für aller Menschen Sünde gestorben/ son-
dern allein für etliche/die Gott in seinem geheimen Rath zum ewi-
gen Leben erschaffen hat.

Der Mensch ist nicht allein gefallen nach vnd aus Göttli-
cher Ordnung/ sondern auch der Teufel selbst ist ein Lügner aus
seinem Befehl/ Hat auch den Teufel vber seine Natur mit der
Sprach versehen/ damit er die Menschen beeriegen köndte / nicht
anders als wie etwa einer einen Strassenreuber/ ein Schwert in
die Seiten güreet/ damit er einen Mord begehen sol.

Diß sind die schreckliche Reden / die sie hin vnd wider füh-
ren/welcher Inhalt/ das wirs gar zum glimpff deuten/ dieser ist /
das diese Schwärmer nur etliche wenig Menschen zu der Liebe
Gottes

Caluinischer Hammerschlag.

Gottes weisen / vnd sagen doch nicht wer dieselben sind / Die andern aber alle in der ganzen Welt führen sie zum strengen Gerichte Gottes / das sie dadurch sollen verdampt werden. Schütze vns du ewiger Gott für solchen schrecklichen portētis vnd monstris. Es erschrickt einer / der nur solche wort mit den cufferlichen Ohren höret / wil geschweigen / das einer dieselben in seinem Herzen vnd Gewissen fühlen sol.

Las vns dein sein vnd bleiben
Du trewer Gott vnd Herr.
Von dir las vns nicht treiben /
Halt vns bey deiner Her /
Herr las vns nur nicht wancken /
Gib vns Beständigkeit /
Dafür wollen wir dir dancken
In alle Ewigkeit / etc.

Fürs dritte / nennen vnd stelen vns auch die Sacramentschens der die Mittel / so vns zur Gerechtigkeit führen ? Welche sind die selbige ? Das Wort vnd die Sacrament / Tauffe vnd Abendmal. Denn also leret vns der heilige Geist.

1. Vom Wort / Rom. am 1. Das Euangelium ist eine Krafft Gottes zur seligkeit / allen die daran glauben. Joh. 8. Warlich / warlich / ich sage euch / so jemand mein Wort wird halten / der wird den Tod nicht schmecken ewiglich. Rom. 10. Der Glaube kömpt aus dem Gehör. 1. Cor. 5. Ich erinnere euch des Euangelij / in welchem ir stehet / durch welches ir auch selig werdet.

2. Von der Tauffe Johan. 3. Warlich / warlich ich sage euch / es sey denn das jemand geboren werde aus dem

¶

dem

Caluinischer Hammerschlag.

dem Wasser vnd Geist / so kan er nicht in das Kelch Gottes kommen. Lu. 3. Gott macht vns selig durch das Bad der Widergeburt. Marc. 16. Wer gleubet vnd getaufft wird / der wird selig.

3. Vom H. Abendmal: Nemet / esset / das ist mein Leib / der für euch gegeben wird zur vergebung der sünden.

Wer vns nu zu diesen Mitteln führet / vnd derselben Krafft v. d. Wirkung vns wol einbildet / der ist ein frommer trewer Lehrer / vnd führet vns zu der Gerechtigkeit / ewigem Leben / vnd Seligkeit: Wer aber vns zu diesen Mitteln nicht führet / sondern davon zu seltsamen / herrischen / lesterlichen Gedancken abführet / der ist ein Wort vnd Sacramentschender / vnd gewislich mit erkandten vnd bekandten Irrthümen beschmeißt / vnd derwegen zu fliehen vnd zu meiden.

Nu thun aber ja solches die Sacramentierer oder Caluinisten / denn also schreiben sie / wie schon droben vermeldet.

1. Vom Wort: Die Sünde wird nicht vergeben durchs Wort / das Mündliche vnd eufferliche gepredigte Wort kan den innerlichen Menschen nichts dienstlich sein / im etwas zu helfen / oder den Glauben zu stercken / etc.

2. Von der Tauffe. Die Kindertauff muß man zwar haben / aber nicht als eine notwendige beförderung vnsers Heils vnd Seligkeit / sondern allein als ein eufferlich Zeichen. Siegel vnd Kennzeichen. Viel tausent Kinder werden getaufft / die doch nicht new geboren werden / sondern ewiglich verderben. Die Kinder / so getaufft werden / ist so ungewis / als es gewis sein mag / Sage noch einmal / Es siche allein in der Vermutung / vnd das mans zu halte / das sie mögen für Kinder Gottes angenommen werden.

3. Vom Abendmal. Christus ist weder leiblich noch wesendlich im Brot gegenwertig. Es kan auff keine Weise geschehen / das man das Fleisch Christi essen möge. Das ist mein Leib / Das ist
so vnk

Caluinischer Hammerschlag.

so viel/ als es bedeute/ *figurirt*, vnd ist ein Abtheilung meines Leibes / Vnd die Lere vom Abendmal des H. Ern / ist kein Artikel des Glaubens/ viel weniger ein Mirackel vnd Wunderwerk.

4. Von der Tauffe der Sacrament ist gemein: Die Sacrament sind allein Zeichen eines heiligen dinges / bringen vnd theilen nicht aus die Gnade / noch stercken den innerlichen Glauben / wirken nichts Geistlichs in vns/ etc.

Hieraus ist gnugsam/ in einer Summa dauon zu reden / zu vermercken/ wie fein vns die Schwärmer zu den Mitteln der Gerechtigk. it führen / das freilich ein jedes frommes Herz wol vrsach hat solche grausame schmeheliche Feinde Christi / der Gerechtigk. it des Glaubens / Wort vnd Sacrament / zu meiden / vnd zu fliehen.

Ich frage ein jedes frommes Herz/ ob es an seinem letzten ende gerecht vnd selig sterben köndte / wenn diese stück war sein.

1. Wenn Christus zutrennet/ halb auff Erden/ ganz im Himmel/ halb Allmechtig/ halb wie ein Mensch/ ohnmechtig vnd lehre/ tröste/ vnd seligmache/ nur allein nach seiner Göttlichen Natur.

2. Wenn der meiste theil der Menschen viel tausend mal tausend/ nach dem heimlichen Rath / nicht schlecht aus verhengnis / sondern aus anordnung Gottes/ von Ewigkeit her verloren/ vnd verdampft sein.

3. Wenn das Mündliche Predigamt nicht dienstlich ist den Glauben zu stercken.

4. Wenn es nur vermuthlich ist / das die Teufflinge Gottes Kinder sind/ ja wenn viel tausend getaufft werden/ die nicht Kinder Gottes werden.

Wenn im heiligen Abendmal nur Brod vnd Wein ist/ vnd der Leib vnd das Blut Christi/ die droben im Himmel sind / nur mit dem Glauben sollen verstanden werden.

O ewiger Gott/ Wo wil da ein arm betrübet Herz hinaus? Wo soltes Rath suchen? Helt es sich zu dem Mündlichen Wort

Caluinischer Hammerschlag.

ee / So ist dasselbe nicht zum Glauben dienstlich / helet es sich zur
Taufe / vielleicht ist es einer aus den viel tausenden / denen die
Taufe nichts tang. Helt es sich zum Abendmal / so findet es alda
nur Brot vnd Wein / Helt es sich zum gnedigen willen Gottes / so
betrifft derselbe nur etliche / die von Ewigkeit darzu versehen sind /
auff die andern alle wartet Hellsch Pech vnd Feuer / Da weiß
ein arm Herz nicht / zu welchem es von Ewigkeit her versehen / wil
es schon etwa im Wort gewisheit suchen / so gehet dasselbe nur
die von ewigkeit Erwehten an. Denn alle heist etliche / Welt
heist etlich aus der Welt / etc. Wil es zu Christo kommen / vnd da
Trost suchen / so ist derselbe nicht für alle gestorben / sondern nur
für etliche / so von ewigkeit her erwehlet / ist / auch sonst nach der
Menschlichen natur / nach welcher Er vns Menschen sonderlich
tröstlich ist / nicht auff Erden / nicht Allmechtig / nicht allwissend /
sondern im Himmel / vns in allen stücken gleich / vñ weiß nicht alles.

Ich habe izo lieber Mensch nicht aus Gottes wort geredet /
sondern des Teufels / vnd der Menschen Feind / vnd der Schwerm
er wort gefüret / auff dz du sehen solt / wo der Teufel hinaus wil.
Das ist war / wenn der Caluinischen Lere Gottes Wort ist / so kan
kein Mensch gründlich schliessen / er sey gerecht vnd heilig. Aber ire
Lere ist nicht Gottes Wort / Sondern ist vnd bleibet des Teufels
wort / Lügen vnd Lesterei. Darumb sol auch ein jedes frommes
Herz solche schreckliche Lere fliehen / als den Teufel selbsts. Wenn
wir gefraget werden von vnser Seligkeit / so wissen wir Gott lob
zu antworten aus dem Wort Gottes / das die Seligkeit ist / vnd
nicht aus des Teufels eingebung / das lauter Todt / Helle / vnd
Hellenangst ist. Ligt ein Mensch in Gottes gewalt / vnd wird ge
fraget / oder fraget sich selber : Bistu auch gerecht ? Antwort :
Woher weißtu das ? Antwort : Denn ich habe einen Mann der
heist Christus / mein Gott vnd Bruder / Allmechtig vnd getrew /
der für mich vnd alle arme Sünder gelitten vnd gestorben.

2. So ist Gott ein trewer Vater / der fordert alle Sünder
zu sich

Caluinischer Hammerschlag.

zu sich. Nu bin ich auch ein Sünder/darumb komme ich/zweifel nicht/Er wird mir helfen.

3. So höre ich vnd weiß Gottes Wort/darinne verkündiget mir der H. Geist solch Verdienst Christi/vnd Gnade des Vaters/neben andern armen Sündern an/vnd wil/ich sol zugreifen/vnd solche Schenke vnd Güter nehmen.

4. In der Tauffe bin ich im Namen des Vaters/des Sohnes/vnd des heiligen Geistes getaufft auff solche Gnade/vnd bin nu newgeboren/vnd ein Kind des ewigen Lebens worden.

5. Christus hat mir noch zum oberflus zu vergebung meiner Sünden/vnd zum Zehrfennig/damit ich durch dieses arme weissen in das ewige Reich/Himlische Leben wandern sol/zum öftermal seinen waren Leib vnd sein warres Blut im heiligen Abendmal zu essen vnd zu trincken geben. Damit kan vnd wil ich mit Fried vnd Frewd von hinnen fahren/vnd mein Leib vnd Seele meinem Erlöser Iesu Christo befehlen/vnd am Jüngsten tage durch die Stimme meines Erlösers mit meinem Leibe wider herfür gehen/vnd mit Leib vnd Seel in Frewden leben ewiglich.

Es da ist Trost/Frewde vnd Leben/da brennet das Herz für der süßigkeit des H. Geistes/der in ons wohnet/vnd wircket/da werden wir des Teufels vnd aller Schwermerischen gedanken los/vnd gehen sein daher in der krafft des Höchsten/können auch mit fried vnd frewd leben/arbeiten/leiden/sterben/vnd wider aufferstehen/Dabey ons Gott gnediglich erhalte/Amen.

III.

Es ist auch vnleugbar/das welche Lerer von der zeit an/da Gott aus lauter Gnade durch den tewren Man Gottes D. Lutherum das Liecht des H. Euangelij in deutschen Landen/wider auffgesteckt hat/für vnd für nach Gottes Wort ausgesetzt/verworffen vnd verdampt sind/das müssen gewislich falsche Lerer vnd Lestere sein/die erkandte vnd bekandte Irrthumb führen.

E iij

Nu

Caluinischer Hammerschlag.

Nu sind die Zwinglianer oder Caluinischen / wie man sie se-
hent von anfang an / in massen solches die ganze warhafftige His-
toria Augspurgischer Confession / vnd alle mit inen gepfloagene
Handelung auswischen / für vnd für ausgesetz vnd verworffen
worden / vnd zwar.

I.

Von allen trewen Lerern vnd Predigern. Denn

Lutherus hats die zeit seines gantzen Lebens
mit den Schwermern nie gehalten / sondern wider dieselbe
mit grossen ernst vnd eifer aus Gottes Wort gewaltiglich
geschrieben vnd gescriitten: Als

Erstlich in seinen Streitschriften / im Buch wider die heims-
lichen Propheten Anno 25. Im Buch das die Wort Christi /
Das ist mein Leib / noch feste stehen / Anno 27. In seinem gros-
sen Bekenntnis Anno 28. In seinem kleinen Bekenntnis Anno 44.

Darnach in Lerschriften / wie dauon Anno 77. M. Petrus
Blaser / damals Prediger in Dresden / ein sonderlich Büchlein
lassen ausgehen / aus welchem nur ein Exempel oder zwey hieher
sollen gesetzt werden.

Anno 20. Im Buch von der Babilonischen Gefengnis spricht
D. Luthers also: Das 6. Capitel Johannis / muß man in diesem
Handel beyseits thun / welches nicht ein Syllaben vom Sacra-
ment redet / vnd war dz Sacrament dazumal noch nit eingesezt /
vnd die *consequentia* vnd Folge derselben reden zeigt deutlich an /
das Christus daselbst rede von dem Glauben an das Wort.

Anno 27. da Luthers Todtfranck gewesen / vnd in hohen Geists-
lichen vnd leiblichen Anfechtungen / in Gottes willen zu leben vnd
zu sterben sich ergeben: Berichtet D. Pommer vnd D. Jonas /
Das D. Luthers zu inen gesaget. Weil die Welt freude vnd lust
hat

Caluinischer Hammerschlag.

hat zu liegen/worden viel sagen/ Ich habe meine Lere vor meinem
Ende widerruffen: Begere derwegen ernstlich/das ir wollet Zeu-
gen sein meines Glaubens Bekenntnis / Ich sage mit gutem Ge-
wissen / recht vnd heilsam habe ich gelert/ Vom Glauben / Liebe /
Creus/ Sacramenten/ vnd andern Artickeln Christlicher Lere.

Anno 23. In Tractat vom anbeten des Sacraments.

Anno 26. In einer Sermon von dem Sacrament des Leibs
vnd Bluts Christi wider die Schwarmgister.

Anno 30. In der vermanung vom Hochwirdigen Sacra-
ment: Die Schwärmer machen aus dem Sacrament eitel Brod
vnd Wein/Sie schelten den Kern/vnd geben den Leuten die Hüls-
fen. Siehe vber das 15. Capittel der ersten Epistel an die Corinthher.

In der Predigt von vnser H. Lauffe/ Anno 25.

In brieff an die Franckforder am Meien geschrieben Anno 33.

In der Kirchenpostill / in der Auslegung der Epistel / des
Sontags *Septuagesime*.

In der Hauptpostill vber das Euangelium *Dominica 1. Ad-
uentus*.

Vber das Euangelium am neuen Jarstage.

Vber das Euangelium *Oculi*.

In der Predigt vom Abendmal des HERRN am Grünend
Donnerstag.

Vber das Euangelium am 5. Sontag *Trinitatis*. Vnd an
andern erten mehr.

Der Herr Philippus hat sich desgleichen/sonderlich bey Les-
benszeiten Lutheri dapffer wider die Zwinglianer erzeigt: Als

In der Epistel an *Decolampadium* geschrieben Anno 29.

In schriftlichen Bedencken wegen des Besprechs zu Mar-
purg Anno 29.

In *Colloquio* zu Marpurg / da er sich mit Zwinglio vns-
terredet/vnd desselben Besprechs Summa an Churfürsten Joh.
zu Sachsen/vnd den Herzog Heinrichen zu Sachsen berichtet /

Anno

Caluinischer Hammerschlag.

Anno 29. In Brieffen mit Brentio an Landgraff Philippen zu Hessen/die Bruderschaft belanget / Anno 30.

Im Brieff an D. Luther/wegen der tückischen *Practica* der Zwinglianer/Anno 30.

Im Brieff an Keiserlichen Prediger Egidium/darin er propheteet von der grossen Zerrüttung / die von den Zwinglianern kommen würde/so man sich mit inen einlest/Anno 30.

In Brieffen an Lutherum vnd Bucerum / wegen Zwinglijs Bekenntnis/Anno 30.

Im Brieff an Bucerum/das ers mit den Zwinglianern nicht halte/noch sich mit inen in ein gesprech einlassen könne/ Anno 30.

Im Büchlein *de Sententijs ex Patribus de Cæna Domini collectis*, Anno 30.

In der Epistel an Martinum Gerlicium Pfarhern zu Braunschweig/Anno 30.

In der Epistel an Rotmannum gegen Münster / Anno 32.

In ein Brieff an Churfürsten Johannem/ darin er schreibt/ Es sey mit den Sacramentierern nur Fürwitz / Freuel der Vernunfft/klugheit vnd wahn/ vnd er wolle es mit den Zwinglischen nicht halten sein Lebenlang/ Anno 37.

Zu Regenspurg auff dem *Colloquio*, da er den 10. Artikel der Augspurgischen *Confession* erkläret/ Anno 41.

In der Antwort die er im Namen aller Theologen zu Wittenberg/solte wegen der Bündnis mit den Schweizern/an Churfürsten zu Sachsen / da er auch/ wie der alte D. Brück in seinem bedencken an Churfürsten vermeldet / gerathen/man sol der Zürichischen Bücher nicht lassen seil haben/ Anno 45.

In seinem deutschen *Examine*, darinnen er sich zu den Niedersechsischen Kirchen/Lübeck/Hamburgk/vnd Lüneburgk bekant.

Vnd ob gleich etliche vndanckbare Schüler vnd Feinde des Herrn Philippi etliche heimliche brieffe herfür gesucht/vñ H. Erri Philippum aller Welt an Branger gestellt / als sey er in seinem
Alter

Caluinischer Hammerschlag.

Alter Caluinisch worden/ So werffen wir doch seine vorige herrliche Lehre/ Mündliche vnd Schriftliche Bekendtnis nicht weg/ sondern bleiben bey demselben/ Alldieweil in allen rechten vns offentlich geschicht /mehr Glaubens hat / als was im finstern vnd verdeckt gehandelt wird.

Diesen zweyen thewren Männern Gottes/ Luthero vnd Philippo/ sind zugleich vnd hernach wider die Sacramentschwermern beygesprungen/ viel grosse Lehrer in der Kirchen Augspurgischer Confession/ Als gewesen sind: D. Iohan Brentius, D. Erhardus Schnepfius, D. Pommer, D. Iustus Jonas, D. Vrbanus Regius, D. Erasmus Albertus, Herr Nicolaus von Amstdorff/ Herr Georgius Spalatinus, D. Iohan Draconites, D. Iohann Försterus, Doct. VVenceslaus Lincx/ D. Pfeffinger, D. Sarcerius, M. Iudex, Matthesius, D. Mirus, Lystenius, D. Bachmeisterus, M. Vitus Dietrich/ Herr Iustus Menius, D. Iacob Marbachius, D. Ioachimus Mörlinus, Herr Iohan VVestphalus, Herr Iohannes Aepinus, D. Tilemannus Heshusius, D. Iohannes VVigandus, Doct. Martinus Chemnitius, D. Iacob. Andrea, D. Timoth. Kirchner/ D. David Chytraus, D. Simon Pauli, D. Nicolaus Selneccerus, D. Andreas Musculus, D. Christophorus Cornerus, D. Iohannes Mattheus, D. Iacobus Herbrandus, M. Adamus Crato, D. Sigfridus Saccus, Simon Gediccus Licentiat, D. Lucas Osiander, D. Stephanus Gerlachius, D. Egidius Hunnichius, Herr Licentiat Hammelmannus. D. Müller/ D. Polycarpus Leiser, D. Iohann Olearius, M. Christianus Kietelman/ M. Fridericus Petri, Neofanius, A. Celichius, D. Hoffmannus, Petrus Rinovius Havelbergensis, Iohan. Modestinus Garwus, vnd sonst viel vnzehliche trewe Lehrer in der Kirchen / vnd Schulen/ die diese grewliche Wölffe Mündlich vnd Schriftlich angebellet / vnd angeschrien. Vnd leben/ Gott lob vnd danck / noch hin vnd wider viel treffliche Männer/ bey denen mehr rath/ Lehre vnd Gewisheit zu finden/ als bey allen Schwermern/ wenn ihr gleich noch so viel weren/ die auch mit ihrem Mund vnd federn
D ihres

Caluinischer Hammer Schlag.

Ihres HERRN Christi Namen/ Lehre/ Ehre/ Gerechtigkeit/ Heil/
vnd Wunden redlich/ thetlich vnd trewlich verkündigen/ in der ge-
meine rühmen/ vnd wider die grausame Feinde vnser Seligkeit/
mit ernst vnd eyfer verfechten vnd verhedigen werden/ in mas-
sen der heilige Geist der Christlichen Kirchen eröstlich zuspricht/
Psal. 45. An stat deiner Väter wirstu Kinder krie-
gen / die wirstu zu Fürsten setzen in aller Welt.

Es lassen ihnen wol jetzt etliche trewmen/ sie haben einen ver-
stand mit der Hellen gemacht / vnd mit dem Todt einen Bundt/
denn sie haben die Lügen ir Zuflucht/ vnd heuchelen ihren schirm ge-
macht/ drümb spotten sie nu vnser/ vnd betriegen Obrigkeit/ land/
Kirchen/ Schul/ Nachkommen/ vnd sich selbst. Aber darauff ant-
wort die Kirche: Ich wil nicht sterben / sondern leben /
vnd des HERRN Werck verkündigen / Psal. 118. Ich
bin für vielen wie ein wunder/ aber du bist meine star-
cke zuuersicht/ Laß meinen Mund deines ruhms vnd
deines Preis viel sein teglich/ Verwirff mich nicht in
meinem Alter/ Verlaß mich nicht/ wenn ich schwach
werde / Denn meine Feinde reden wider mich/ Vnd
die auff meine Seele halten / berathen sich mit ein-
ander / vnd sprechen: GOTT hat ihn verlassen/
jaget nach vnd ergreiffte ihn / Denn da ist kein Er-
retter/ GOTT sey nicht ferne von mir / Mein Gott
eile mir zu helfen / mit Schandt vnd Hohn müssen
sie überschüttet werden/ die mein vnglück suchen/ Ich
aber wil immer harren/ vnd wil immer deines ruhms
mehr machen.

Die Wittembergische Vniuersitet hat den Sacrament-
schwarm

Caluinischer Hammerschlag.

schwarm/bey lebens zeit Lutheri/ vnd hernach öffentlich nie gebil-
licheit noch vertheidiget/sondern allezeit verworffen vnd verdampft.
Denn da haben gelebet Doctor Luther/Doctor Pommer/ Doct.
Jonas/Herr Philippus/D. Förster/Herr Nicolaus von Amst-
dorff/Doctor Eberus/D. Winshemius/D. Eberhardus/ Doct.
Mylus / D. Polycarpus / Doctor Mattheus / die den Sacra-
mentenschwarm allda nicht einnisteln lassen / Sondern dawieder
Mündtlich vnd Schriftlich / Vnd sonderlich in einem Bes-
dencken an Landtgraffen Philippum/ die Brüderschafft mit den
Zwinglianern widerrathen / vnd von wort zu Wort widerholet/
was zu Augspurg Philippus vnd Brennius mit einander von ob-
gedachter gesuchter Brüderschafft geantwortet haben / Anno
1531.

Item/ in einem Bedencken an Churfürsten zu Sachsen/
Herzog Friederich/ein Bündnis mit den Schweizern zu mach-
en/widerrathen/ Anno 45.

Deßgleichen im Bedencken an Johann Selnudum/ da-
mals erweltten König in Ungern/ etc. zugleich mit der Vniuers-
itet Leipzig den Sacramentschwarm verworffen / vnd für billich
vnd Gottes Wort gemess erkandt/ das irere Lehrer den jenigen/
die in Siebenbürgen die Lehre von der Gegenwart des Leibs vnd
Blutes Christi im Abendmal verwerffen / schmechen / vnd als
Beystlich vnd Abgöttisch verdammen dürffen / mit gebürlicher
Beschaidenheit vnd Sanfftmütigkeit/ auch (weil nicht die Zuhö-
rer/sondern etliche newlich eingeschlichene Prediger/ die Zwingli-
sche Lehre vnd Meinung von dem heiligen Abendmal einführen
wolten) mit gehaltenen billiger Vnterscheid zwischen den *sanabi-*
libus & docilibus / vnd *insanabilibus* vnd *pertinacibus* widerspre-
chen / Anno 61.

Deßgleichen haben auch in der Vniuersitet Leipzig/ die
Lehrer in Kirchen vnd Schulen dem Sacramentschwarm wi-
dersprochen/sonderlich D. Pseffinger/Sarcerius, Menius/ Doct.
Selnegger.

D i j

Wie

Caluinischer Hammerschlag.

Wie auch die andern Vniuersiteten / Heidelberg / Mar-
purgk / Kostoek / Thübingen / Jhen / Franckfurt an der Oder /
Helmstedt / etc. die Zwinglischen allzeit außgesetzt vnd verworffen.

Da auch gleich an etlichen örten etliche wider Gott / Obri-
gkeit / Landt vnd Kirchen / den Sacramentschwermern zu gefal-
len / viel vnd seltsamer Tück / Sacramentschwermerey einzufüh-
ren / sich vnterstanden / So ist doch gemeiniglich alles heimlicher
vnd tückmeusischer weise zugangen / Welches hernach an etlichen
orten durch Gottes Gnade von der hohen Obrikgkeit gemercket /
gestrafft vnd geendert worden. Gott behüte vns ferner für den
Schwermern.

II.

Von allen Versammlungen / Collo- quijs vnd Reichstagen.

A N N O 1529. Im Gespräch zu Marpurgk / hat
Zwingel von D. Luthern begeret / er wolle sie als seine Brüs-
der erkennen / vnd nennen / Wie er denn auch öffentlich mit
weinenden Augen für dem Landtgraffen vnd allen gebeten / vnd
diese wort gesaget : Es sind keine Leute auff Erden / mit denen ich
lieber wolt einig sein / als mit den Wittebergern. Aber D. Luther
hat sie für Brüder nicht halten können noch wollen.

Da Anno 30. auff dem grossen Reichstage zu Augspurg /
die Artikel der Augspurgischen Confession vnter den Protestiren-
den bewogen worden / vnd vnter denen fürnemlich der Behende /
Ist ein Schreiben außkommen / darinnen begeret / das die Luthes-
rischen die Zwinglianer in ihre Gesellschaft nemen solten / darmit
sie auch zu gemeiner Vnterschreibung der Augspurgischen Con-
fession zugelassen würden. Aber Philippus vnd Brentius haben
in zweyen Schreiben an Landtgraff Philippum zu Hessen solche
Brüderschafft *simpliciter* abgeschlagen.

Eben auff diesem Reichstage ist die Augspurgische Confes-
sion

Caluinischer Hammerschlag.

von Carolo dem fünfften / damals Keisern vbergeben worden /
Darinnen im zehenden Artickel die Zwinglianer / vnd ihre Lehre
außgeschlossen / mit der *Clausula* / so im Deutschen vnd Lateini-
schen Exemplar gestanden. *Et improbant secus docentes* / Vnd
wird die Gegenlehr verworffen / darumb denn auch die vier stede
te / Straßburg / Eosnis / Memmingen / Lindaw / die darnals nicht
einerley meinung mit den Protestirenden waren / ein sonderliche
Confession vbergeben / vnd die von Memmingen vnd Lindaw
hernach in ihrem offenen Ausschreiben bekandt / das Anno 30. ihre
Prediger Zwinglisch gewesen.

Anno 31. ist zu Schmalkalden mit Zusamenkunfft der Fürs-
ten vnd Städte angestellet / vnd der Schmalkaldische Bunde
auffgerichtet worden / Die Zwinglischen aber sind zu keiner bünd-
nis zugelassen worden.

Anno 32. sind die Schweizer vmb ihres Zwinglischen Tre-
thums willen / von dem bündniß außdrücklich abgewiesen wor-
den.

Nach dem auch die Zwinglischen / sonderlich aber *Bucerus*
es mit D. Luthero nicht halten wollen / vnd doch immer *conci-
liones* vnd Vergleichung gesucht / vnd fürgeschlagen / auch fürge-
ben / es were nur vmb sonderbare rede zu thun / die in einem Christ-
lichen gesprech köndten erörtert werden / sonst weren sie mit Luthero
in der Hauptsachen einig / in massen denn in ihrem Schreiben
an Landgraff Philippum zu Augspurg Anno 30. gebracht / Herrn
Philippi Brieff an *Bucerum* vnd seine Verwandte / darinnen sich
Philippus erkleret / das ers mit den Zwinglischen nicht halte / noch
sich mit ihnen in ein Gespreche einlassen könne / Anno 30. in *Buce-
ri* Brieff an Lutherum / Anno 30. aus der Reise *Buceri* nach Cos-
burg zu D. Luthero / Anno 30. Im Brieff *Buceri* an Herzog
Ernsten zu Lüneburg / Anno 31. Im Brieffe *Buceri* an *Bullingerum*
vnd Leonem gegen Zürich / darinnen er vermeldet / das Luthero
Lehre leidlich / Anno 31. In der defension Schrifft *Buceri* wis

Caluinischer Hammerschlag.

der *Robertum Episcopum Abriacensem Gallum*, darinnen er Doct.
Lutheri Lehr vertheidiget. Anno 34. aus dem Handelstag zu Cas-
sel in H. N. darzu Bucerus vnd Philippus gefordert / da Buc-
cerus der Augspurgischen Confession gemess zu lehren verheissen /
Anno 35. zu erschen / Nach dem sich / wie gemeldet Bucerus al-
so eine lange zeit der Concordi halben bemüheth / Vnd wie der herr
Matthesius in der Historia D. Martini Lutheri meldet / Zwingel
vnd Decolampadius / sampt andern kurtz zuuor schrecklich auff-
gereumet / vnd viel guter Leute in den Oberlendischen Kirchen
Gottes gericht / an denen / so sich mutwillig wider des H. Ern A-
bendmal vnd heilige Tauffe eingelassen / spüreten: Also ist ein
Tag Anno 36. zu Strassburg angestellet worden / dar auff viel
gelerte / auch Gesandte aus etlichen örten in Schwetz / erschienen /
vnd Bucerum / Capitonem / vnd andere nach Wittenberg abgefes-
tiget: Alda hat ihnen D. Luther / wie er in Göttlichen Sachen ge-
pfleget / mit grossen ernst / Geist vnd Mut / der auch an seinen aus-
gen vnd ganzem Angesichte zu sehen gewesen / das *κειρόμενον* / oder
statum controversia / den Hauptpunct dürre vnd rund fürgeleget /
Nemlich:

Erstlich / ob Bucerus mit den seinen das tenige was sie bis-
her wider des H. Ern Christi / der h. schriffe vnd Kirchen Lere / ge-
leret / widerruffen / vnd öffentlich vnrecht sprechen wolten.

Fürs ander / ob sie leren vnd glauben wollen / das das Brot
sey der Leib Christi für vns gegeben / vnd der Wein das Blut
Christi für vns vergossen / aus Krafft vnd Einsetzung Christi / der
es also geordnet / es sey gleich der Diener / der es darreichet / oder
der es empfehet / würdig oder vnwürdig.

Als nu D. Luther solche zweene Punct Bucero vnd den
seinen fürgehalten / vnd widerholet / au. h. mit grosser freude / ernst /
vnd eifer dieselbigen vermahnet / das sie ja Herz vnd Wort zusa-
men setzen wolten / vnd gedencen / wenn sie gleich die Welt betrie-
gen würden / so würden sie doch die Augen vnd Ohren des H. Er-
ren

Caluinischer Hammer Schlag.

ren/ der alle ding ſihet vnd höret/ nicht betriegen. Da hat Bucer ſeine Fehle erkennet/ vnd mit den ſeinen/ vnd ſie mit ihm/ ein jeder für gewis geantwortet: Er bekenne / helt vnd glaube eben das/ was D. Luther ihm ſürgehalten / Vnd diß weil gleichwol Lutherus aus dieſer ſhrer Auffage vnd Bekentnis nicht aller dinge be- ruhen wollen/ iſt er mit den ſeinen auffgeſtanden/ vnd Bucero vnd den ſeinen die Sache ja wol zu beherzigen befohlen/ Vnd da er wider zu ihnen kommen / die Hauptpunct nochmals ihnen ſürge- legte/ darauff ſie eben außgeſaget/ wie zuuor/ vnd Capito vnd Bucerus angefangen zu weinen.

Iſt alſo Friede vnd einigkeit zwifchen ihnen damals ge- macht worden / Darauff auch Bucerus ſampt Capitone in der Pfarrkirchen am Sonntag *Exaudi* öffentlich das heilige Sacra- ment genommen / vnd ſich alſo zu der Wittenbergiſchen Kirchen bekandt/ di: damals noch keine andere lehre bekandt noch gehabt/ denn allein die / welche Gott durch ſeinen außgewählten Werk- zeug Lutherum geoffenbaret hat / hat auch vber das Bucerus am ſelben Sonntag nach Mittag in der Pfarrkirchen öffentlich ſeine vorige meinung widerruffen/ auch ſeine *retractationes in Septembe- bri* öffentlich drucken laſſen. Bey ſolcher Erkendnis iſt D. Lu- ther der ehewre Held bis an ſein ende beſtendig beharret/ Bucerus aber / ob er wol / nach deme er wider anheim kommen/ retractiret vnd widerruffen / So hat er doch zu Straßburg dem Heiligen Paulo/ vnd der Wittenbergiſchen Concordien ganz zu wider/ ein new Gedicht von dreyerley Leuten / die in der Kirchen das Abendmal empfiengen / auff die Bahne bracht / auch ſonſten die Sachen / in maſſen aus Conrads Pellican eines Sacramentier- ers Schreiben / an ſeiner Freunde einen / nach Wittenberg zu verſtehen / nicht aller dinge / wie ſie zu Wittenberg geſchehen/ erzelt/ vnd ſchlechts die ſtedte in der Schweiz dahin bereden wol- len/ als were Lutherus zu inen getreten/ ſo habē auch die Zürcher die Wittenbergiſche einigkeit nicht billigen noch annemen wollen.

III

Caluinischer Hammerschiag.

Ist also der Sacramentstreit von den Zürchern sonderlich Anno 43. auff bitterste wider ernewert worden. Darumb auch Lutherus mit ihnen weiter nichts zuthun wollen haben / vnd zu guter letze noch sein kurzes Bekennuß Anno 44. geschrieben.

Anno 37. Ist zu Schmalkalden der Churfürsten vnd Stendeag gehalten worden / allda sonderlich in *D. Brentij subscription* der Wittenbergischen *Concordia* gedacht / vnd zu verstehen gegeben / wie von *D. Luthern* / vnd andern vnser Theils / die vor einem Jahr auffgerichte *Concordia* verstanden vnd angenommen worden / Nemlich nichts anders / denn wie der sechste Artikel im dritten theil lautet / daß das Brode vnd Wein im Abendmal sey der warhaffte Leib vnd Blut Christi / vnd werde nicht allein gesreicht vnd empfangen von fromen / sondern auch von bösen Christen. Vnd da ist damol zugleich auch der Augspurgischen Confession unterschrieben / vnd also die Augspurgische Confession vnd Schmalkaldische Artikel von den vnsern für ein Bekenndnuß gehalten worden.

Anno 41. Ist zu Regenspurg ein Gespräch gehalten worden. Allda im lateinischen Exemplar der Augspurgischen Confession / die zuuor außgesetzte Wort *adsint & distribuantur* / für welches das wörtlein *exhibeantur* / das den Sacramentirern gefellig war gesetzt worden / vnd der *Appendix improbant secus docentes* / restituirt vnd eingesetzt / vnd also quasi solenniter der Augspurgischen Confession wider zugestellet worden / zum zeugnis / das der Protestirenden Stende vnd Kirchen mit den Zwinglischen ihrer Lehre halben nicht einig.

Anno 1543. Ist die Caluinische Reformation von Philippo vnd Bucero verfasst worden. Allda hat Bucerus / wie Philippus an Lutherum geschrieben / ein Artikel vom Sacrament / mit vielen Worten den Brauch des Sacraments erkleret / Aber den Punct von der Gegenwertigkeit des Leibes vnd Blutes Christi vbergangen. Solches hat *D. Luther* nicht wenig betrübet / vnd
dere

Caluinischer Hammerschlag.

Derwegen Philippum zur rede damals gesetzt. Wie nuhn solchs an Bucerum gelanget/vnnd er Anno 44. eine Apologiam vber die Caluinische Reformation hat stellen müssen/hat er den außgelassenen Punct erkleret.

Anno 55 Ist der Religionsfriede zwischen der Augspurgischen Confession verwandten Stenden / vnnd den Beptischen zuvor im Pastawischen Vertrag Anno 52. bewilliget / auff dem Reichstag zu Augspurg von der Röm. Kön. Mayestat vnnd gemeinen Stenden auffgerichtet/vnd publicirt worden/ das hinfore der Papistischen vnnd Augspurgischen Confession verwandten/ Religion im Heiligen Reich Deutscher Nation geschützet vnnd geheget sein sollen/ doch das alle andere/ so obgemelten beyden Religion nicht anhengig / in diesem frieden nicht gemeinet / sondern gentslich außgeschlossen sein.

Anno 1558. Ist ein Churfürsten Tag zu Franckfurt am Meyen angestellet vnnd gehalten worden / da die Protestierende Churfürsten neben andern grossen Sachen/die Wahl des Römischen Keyfers belangende/ auch berathschlagt/wie eine beständige Vergleichung/der vnter den vnsern entstandenen Spaltung/wegen etlicher in Streit gezogener Religions Artikel/möcht getroffen werden/mit vorbehaltung / das man in einer gemeinen zusammentunfft / was mehr von nöthen sein würde / einmütiglich vnd freundlich sich vnterreden wolle.

Anno 1558. Ist in Gegenwart Pfalzgraffen Friederich Churfürsten/vnnd Herzog Johann Friederich zu Sachsen eine öffentliche disputacion zu Heidelberg zwischen D. Maximiliano Mörliano/vnd M. Johann Stössel / Weimarischer Theologen/vnd des andern Theils geleerte gehalten worden.

Anno 61. Ist der Chur vnnd Fürsten zusammentunfft zur Naumburg gehalten worden/wegen Augspurgischer Confession/dadurch/wie der Chur vnd Fürsten Abschied lautet/ nichts neues gesucht vnd gehandelt / sondern allein/das zuuorn außgegangene

E

Wekendt

Caluinischer Hammerschlag.

Bekendnuß (verstehe Anno 30. zu Augspurg vbergeben) widerholet zu mehrerung/ erhaltung vnd Ausbreitung Christlicher Einigkeit. Vnd in der Vorrede des Christlichen Concordienbuchs/ erkleren sich die löblichen Stende/das inen/durch ihre/zu Franckfurt am Meyen vnd Naumburg auffgerichte vnd wolgemeinete Abschied/ in ihr Gemüt vnd Herz nicht kommen/ das sie durch dieselbige/ einige/ newe falsche oder irrige Lehre einführen/ beschönnen/ bestetigen/ oder von der Anno 30. vbergeben Augspurgischen Confession abweichen wolten/etc.

Eben in dem Jahr haben die Fürsten vnd Stende des Niedersächsischen Kreises einen Tag in der Stadt Braunschweig gehalten/darinnen Albertus Hardenberger ein grosser Sacramentsbender/Thumprediger zu Bremen/ der eine sehr lange zeit seinen Caluinischen Schwarm heimlich im Busen getragen/nicht allein aus der Stadt Bremen/sondern auch aus dem ganzen Niedersächsischen Kreis ist abgeschafft worden.

Deßgleichen ist eben in diesem Jar in der Stadt Lüneburg von den Hensen oder Seesteden ein Tag fargenommen/ vnd verrichtet worden/allda alle Sacramentarii/alte vnd newe/ auch alle der jenigen Scripta/die *ambiguis interpretationibus* den Sacramentirenn helfen/ vnd klaren vnterscheid vnser vnd ihrer Lehre vertunckeln/verworffen vnd verdampft worden.

Anno 64. ist abermal in Gegenwart Pfalzgraffen Friedrich Churfürsten/ vnd Herzog Christophori zu Wirtemberg/eine öffentliche disputacion zu Maulbrun zwischē D. Petro Boquino/ D. Casparo Oleuiano/ vnd Zacharia Vrsino des andern Theils/ vnd Doct. Jacobo Andree/ vnsero Theils Theologen gehalten worden.

Anno 76. sind von dem Hochlöblichen Churfürsten Augusto seliger gedechtnis/ ins Schloß Liechtenberg/an der Elb gelegen/ beruffen worden nachfolgende Herrn: D. Henricus Saluath, D. Paulus Crell, D. Nicolaus Selnecker, D. Volfgangus Har

Caluinischer Hammerschlag.

Harder, D. Maximilianus Morlin/ Herr Daniel Grefser/ Doct.
Martinus Mirus, M. Georgius Lifthenius, M. Nicolaus Jagens
teuffel/ M. Iohan. Cornicalius, M. Iohan. Sagittarius, M. Petrus
Glaserus. Von diesen hat der Gottselige Churfürst gnedigst ein
Mittel begert / wie doch forthin die Theologen vnd Kirchen der
Augspurgischen Confession widerumb ohne zerrüttung der Lehre/
vnd verletzung der Gewissen/ in einen friedlichen Standt gesetzt/
Christliche einigkeit getroffen/ gestiftet/ vnd mit Gottes Gnade
erhalten werden möchte/ doch sey S. C. G. meinung nicht/ das zu
diesem Werck die Caluinischen Theologen gezogen / oder mit
denselbigen einiger Tractat vnd Vergleichung/ oder einigkeit ge-
pflogen vnd getroffen werden solte. Für solchen gnedigsten willen
des Churfürsten haben die Herren Theologi Gott dem H. E. N.
K. E. N. vnd seiner Churfürstlichen Gnaden unterthenigst gedan-
cket/ vnd drey Christliche Mittel/ dadurch eine Christliche Einig-
keit köndte getroffen werden/ fürgeschlagen. Vnd ist also auff diß-
mal/ G. D. T. lob/ ein guter Anfang zum Christlichen heilsamen
Concordienwerck gemacht worden/ Dafür Gott herzlich zu
dancken.

Anno 77. Ist das Christliche Concordienbuch / Das ist/
die Christliche widerholte einmütige Bekendnuß der Augspur-
gischen Confession verwandten Churfürsten/ Fürsten vnd Stende/
vnd derselben Theologen Lere vnd Glaubens/ mit angehefter in
Gottes Wort/ als der einigen Richtschnur wolgegründten erkla-
rung eelicher Artikel/ bey welchen nach D. Martin Luthers seli-
gem absterben / disputation vund Streit fürgefallen / zum Ende
gebracht / vnd hernach Anno 80. aus einhelliger Vergleichung
vnd Befehl höchstgedachter Churfürsten/ Fürsten vnd Stende/
derselben Landen Kirchen/ Schulen vnd Nachkommen zum unter-
richt vnd Warnung in Druck verfertigt: In denselben werden
mit mund vnd herzen/ als falsch irrig vnd verführisch/ alle Sacra-
mentenliche Opinionsen vnd Lehren verworffen vnd verdampt.

Caluinischer Hammersehlag.

Vnnd haben sich vnterschrieben viel grosse Potentaten / vnnd
Liechter in Kirchen vnnd Schulen / Die drey damals Weltliche
Churfürsten / 18. Fürsten / zween Fürstliche Graffen / 22. Graffen /
4. Freyherrn / 35. Reichstedte / 8000. Lehrer.

Anno 83. Ist auff Anordnung der dreyen Weltlichen
Churfürsten / Pfalz / Sachsen vnnd Brandenburg / durch etliche
dazu verordnete Theologen die Apologia oder Verantwortung
des Christlichen Concordienbuchs gestellet / Vnd hernach Anno
84. in Druck verfertiget / in welcher die ware Christliche Lehre /
so im Concordien Buch verfasst / mit gutem Grunde vnd heiliger
Göelicher Schrift vertheidiget / Die Verkchrung aber vnnd
Calunnien / so von vnruhigen Leuten wider gedachtes Christlich
ches Buch in Druck außgesprenge / widerleget worden / Darfür
Gott herzlich zu danken.

Anno 84. Ist wider zu Heidelberg zwischen Bryneodes
andern theils / vnnd etlichen vnserer theils Theologen eine öffentliche
disputation gehalten worden / darauff die vnsern wider Recht vnnd
billigkeit abgeschafft / vnnd an derselben stat Caluinische Prediger
eingedrungen worden.

Anno 86. Ist in gegenwart des löblichen Fürsten Friederici
Graff zu Wirtenberg vnd Mompelgart eine disputation zu
Mompelgart / zwischen D. Iacobo Andrea Professorn / Canslern
vnnd Probst zu Tübingen vnserer Theils / vnnd Beza Pfarrherrn
zu Genff / anders theils Theologen gehalten worden.

Zum dritten / So sind die Sacramentirer auch verworffen
worden von Keysern / Churfürsten / Fürsten vnnd Stenden des
heiligen Reichs.

Anno 31. hat Carolus der Fünffte / damals Römischer
Keyser Churfürst Johannem / Wilhelm Graff zu Nassaw / vnnd
Wilhelm Graff zu Neuttar geschickt / vnnd im vnser andern fürge
halten / der Keyser were berichte / das dem Churfürsten des Zwins
gels / vnnd der Widerteuffer Lehre gefiel. Darauff der Christliche
Chur

Caluinischer Hammerschlag.

Churfürst eine Christliche Fürstliche antwort gegeben/ vnd sich erkleret/ das er die Zwinglischen in seinem Lande nicht dulden wolle noch könne.

Anno 34. hat Ferdinandus / dazumal Römischer König an Churfürsten zu Sachsen Johan Friederich geschrieben / das die Sacramentierer nicht geduldet noch gelitten werden sollen/ vnter welchem wort Sacramentierer die Zwinglischen/ die das Hochwürdige Sacrament nicht ehren / vnd nichts dauon halten/ verstanden werden / dieweil zu besorgen das / wo nicht nothdürfftig ein Ansehen geschehe / aus der Zwinglischen Sect. verführung Christlicher Gewissen/ vnwiderbringlichen Schaden vnd Nachtheil gemeiner Christenheit / daneben abfall vnd Minderung des Reichs Stende / vnd fürnemlich auch Vngehorsam/ Empörung vnd Aufstände des gemeinen Mannes wider die Oberkeit erfolgen werde / etc. Darauff der Hochlöbliche Churfürst geantwortet/ das sein Herr Vater seliger / vnd er allezeit der Zwinglischen lehre nicht weniger denn jemand anders zuwider gewest/ wolle auch nochmals die Zwinglische Lehre vnd die Widerteuffer in seinem Lande nicht leiden/ sondern mit schreiben/ beten vnd predigen auff'scherffste widersechten lassen.

Anno 66. auff dem Reichstage zu Augspurg/ hat Maximilianus der ander/ Römischer Keyser / dieses zum ersten den Stenden fürgehalten/ dieweil der Religions Friede nur allein die/ Beystlichen vnd der Augspurgischen Confession Verwandten betreffe/ nu aber allenthalben allerley Secten sich erzeigeten vnd mehreren / Als solten erstlich des heiligen Römischen Reichs Stende auff mittel vnd wege bedacht sein / wie obgedachte Secten abgeschaffe/ vnd weggerumpt würden. Daher haben die Fürsten vnd Stende der Augspurgischen Confession/ mit Pfalzgraffen Friederich Churfürsten sich vnterredet/ vnd ihm angezeigt / das sie die Religion belangend/ mit ihm nichts handeln köndten/ er verwerffe denn zuvor die Zwinglische Meinung vom Sacrament.

Caluinischer Hammerschlag.

Anno 53. Ist in Dennemarc mit zweyen Königlichen Schiffen ankommen Johannes Basko/ ein Polnischer Herr/welcher zuvor in Engelland eine sonderliche Zwinglische Kirche angericht/ vnd nu in die hoffnung gemacht/ er würde zu Kopenhagen/ allda er ankommen/ vnd sonst in dem Königreich mit den seinen leichtlich Herberg vnd Unterhaltung finden/ Diemell aber Baski Verwandten sich öffentlich hören lieffen/ das sie Zwinglisch oder Caluinisch weren/ vnd dabey bleiben wolten/ auch darauff eine eigene freye Kirche begerten/ hat das fromme Goetselige Herrs König Christianus in Dennemarc sie der gestalt nicht leiden wollen/ sondern das ganze Königreich verboten/ auch durch ein öffentliches ernstes Edict allen seinen Unterthanen befohlen/ das sie die Widerteuffer/ Sacramentirer/ vnd andere Secten zur Herberge nicht aufzunehmen solten.

Anno 61. hat Johannes Secundus/ erwählter König in Ungern/ Dalmatien, Croatien, &c. an die Theologen der Vniuersiteten/ Leipzig/ Witttemberg/ vnd Rostock ein schreiben abgefertiget/ vnd ihnen gnedigst zu erkennen geben/ wie etliche Prediger in Siebenbürgen bey Lutherischer schlechter vnd rechter meinung vom Abendmal des HErrn fest vnd bestendig blieben/ etliche andere aber newlich eingeschlichene Prediger/ die Lehre vnd Meinung von dem Abendmahl führen wolten/ dagegen sein S. K. M. der reinen Goetseligen Religion/ darinnen sie von jugend auff Christlich erzogen/ gewogen/ vnd beklagen den Vnfall/ so bisher sein S. K. M. lieben getrewen Unterthan/ Ungern vnd Siebenbürgen entstehet: Bitte auch ganz fleissig/ die Vniuersiteten wollen ihr ernstlich Bedencken darüber S. K. M. vnd den Kirchen in Siebenbürgen in Schrifften erklären vnd mittheilen/ auff das allem Vnruß bey zeit köndt vorkommen/ vnd gestillet werden. Darauff haben die drey obgedachte löbliche Vniuersiteten ihr Bedencken gestellet/ vnd die Zwinglische Meinung verworffen.

Das Hochlöbliche Chur vnd Fürstliche Haus Sachsen/
vnter

Caluinischer Hammerschlag.

unter welchem Gott der Allmechtige in diesen letzten Hefen der Welt/das Liecht des heiligen Euangelij / durch den trewen dienst Lutheri in Deutschlandt angezündt / vnd hernach in die benachbarte Königreich vnd Fürstenthumb weit^{er} außgebreitet / ist den Zwinglischen vnd Caluinischen Irthumen vnd Lestungen alle zeit von Herben feindt gewesen / vnd in ihrem ganzen Chur vnd Fürstenthümen / Landen / Kirchen vnd Schulen verboten / verdamp / vnd ernstlich gestrafft.

Denn der beständige Churfürst Johan / ist auff dem grossen Reich tag zu Augspurg der harnempste gewesen / der Gottes wort frey öffentlich / mit gefahr Leibes vnd Lebens / vnd ihrer Landen / vor der ganzen welt erkandt vnd bekandt / vnd die Augspurgische Confession / darinnen die Zwinglianer außgesetzt / nicht allein für andern gefördert / sondern auch neben andern wenig Fürsten vnd Stenden unterschrieben / Keyser Carolo dem Fünfften vbergeben / vnd dauon weder durch lust noch furcht / Freundschaft noch Feindschaft im geringsten sich abwenden lassen. Hat auch an Keyser Carolum Anno 31. geschrieben / Es were öffentlich / das an keinem ort der Christenheit / so geschwind / gründlich vnd hart wider die Sacramentirer geprediget / gelehret vnd geschriben würde / als in seinem des Churfürsten Landen / vnd Fürstenthumen / er wolle auch aller Sacramentschwerner / oder derselben Freunde sich einschlagen / vnd euffern.

Vnd sein Sohn Herzog Johan Friederich / hat sich in der Zusammenkunfft zu Schmalkalden im folgenden Jahr vernehmen lassen / Wo die Endgnossen von Zürich / Bern / vnd Basel / den Artikel vom Abendmal klar zuschreiben würden / hette er seinen herrn Vatern Befehl / sie williglich einzunehmen / dieweil er aber solches nicht vermercken köndte / hette er auch zu schliessen keine Gewalt.

Der trewe Bekenner vnd Wertterer Christi / Churfürst Johan Friederich / hat gleicher gestalt mit seinem Herrn Vater vnd
etliche

Caluinischer Hammerschlag.

elichen andern wenig Fürsten zu Augspurg Anno 30. der Confession unterschrieben / Anno 34. an Ferdinandum damals Römischen König geschrieben / er wolle die Zwinglische lehre in seinen Landen nicht leiden / sondern mit schreiben / lehren vnd predigen auffsscherffste widersechten lassen.

Anno 44. hat er gen Wittenberg den alten D. Brücken abgefertiget / wie das S. E. F. G. sich befahren müssen / so insonderheit Doctor Martinus oder er der Churfürst das Heupe legte / das als denn die Zueyung gewaltig würde wollen getrieben vnd vorgenommen werden / vnd er S. Churf. G. solchs wissenschaftlich dulden oder einwurfseln lassen / gedechten sie es ehe dahin zu stellen / ob gleich eine geringe Vniuersitet / oder zu letzt auch gar keine sein oder bleiben sollte / das doch S. Churf. G. nicht gern wolten / etc.

Der Gottesfürchtige Fürst Herzog Heinrich / hat nach absterben seines Herrn Brudern Herzog Georgen die Kirchen vnd Schulen in Meissen bestellen lassen / vnd die rechte reine Lehr / wie von allen Artikel / also auch vom H. Abendmal nach Gottes Wort vnd der Augspurgischen Confession zu predigen mit grossem eyfer befohlen.

Der streitbare Helde Churfürst Mauritius / hat nicht allein keine Sacramentschwermerey in seinen Landen wissenschaftlich gelitten / sondern auch durch Gottes Gnade es endlich mit den Widersachern den Bepfischen dahin gebracht / das der Religions Friede zwischen den Bepfischen vnd der Augspurgischen Confession Verwandten Anno 52. zu Passaw bewilligt / vnd Anno 55. zu Augspurg publicirt worden / in welcher die Sacramentschwermer außgesetzt sind.

Was auch der grosse Churfürst Augustus / gegen der Sacrament vnd des grossen Mans Lutheri Feinden Carlstadio / Zwingel / Decolampad / vnd ihrer Schüler zu Zürich / vnd wo sie sind / für ein Werk gehabe / das ist Gott lob vnd danck am Tage.
Er

Caluinischer Hammerschlag.

Er ist durch Göttliche Gnade in der Christlichen Religion/so in Augspurgischer Confession verfasst/ von seinen Hochlöblichen Eltern auferzogen worden/ vnd erwachsen/ die auch bey seiner Regierung vnuerfälscht lehren lassen / darbey vermittelst Göttlicher Hülffe standhafftig geblieben / vnd öffentlich sich darzu bekennet/ Hat auch von keiner andern Augspurgischen Confession wissen wollen/ denn von der/ so Keyserlicher Mayestet auff dem Reichstage zu Augspurg Anno 30. durch Herzog Hansen Churfürsten seligen/ den Landtgraffen / vnd etlichen andern wenig Fürsten/ Graffen vnd Stedten vbergeben / vnd folgendes hernach zu Wittenberg öffentlich in Druck außgangen. Im Artikel vom heiligen Abendmal/ hat er vor den lesterischen Caluinischen oder Sacramentirischen / auch für tockmeusischen vnd vnredlichen Lehrern/ ein herzlich abschew gehabt/ vnd seinem einigen Herrn vnd Erlöser Christo / das lob der Allmacht / Wahrheit vnd Weisheit/ als ein Christlicher Churfürst geben/ ob er gleich/ in massen auch wir alle / nicht verstehen können / wie es zugehe/ das der Leib vnd Blut Christi im Abendmahl sey. Da auch etliche in S. Ch. G. Landen / Kirchen vnd Schulen frembde lesterliche Lehre wollen einführen/ hat seine Ch. G. mit grossem Geist Christlicher fürsorge/ vnd anwendung grosser Kosten solche heimliche Practica abgewendet/ vnd durch Gottes Gnade Christliche Einigkeit getroffen vnd gestiftet.

Die drey Gottselige Herzogen zu Sachsen/ Herzog Johan Friederich der ander/ Herzog Johan Wilhelm/ Herzog Johan Friederich der Dritte/ haben gleicher gestalt an dem Caluinischen Schwarm ein herzlich mißfallen allezeit gehabt/ Vnd sonderlich Anno 59. ein Confutationbuch drucken lassen / in welchem vnter andern / auch die Lehre vom hochwürdigen Sacrament aus gutem Grunde Göttlichen Worts recht Lutherisch erkleret / vnd der Sacramentirer Ströme Grund ganz gründlich vnd beständig widergelegt worden.

Die frommen vnd von Gott hochbegabten Herzogen zu
S
Wei

Caluinischer Hammer Schlag.

Weimar vnd Coburg / erzeigen sich Gott lob / je auch als fromme Fürsten / vnd thun wie ihre Herren Großväter vnd Väter gethan / das ist / halten Gottes Wort vnd reine Lutherische Prediger für ihren edelsten Schatz / sehen sich vmb nach getrewen vnd reinen Lehrern im Lande / vnd lassen die Sacramentschwärmer in ihrer S. G. landen nicht einnisteln.

Also haben gethan viel Christliche Chur vnd Fürstliche Heuser des heiligen Reichs / Pfalz / Brandenburg / Magdeburg / Braunschweig / Wirtemberg / Lüneburg / vnd Stedte im heiligen Reich / welche zugleich den Caluinischen schwarm mit desselben offentlichen Lehrern / vnd halbstarrigen Vertheidigern / nie auff ein Polster gesetzt / sondern aus ihren Chur vnd Fürstenthümen / Landen vnd Stedten verwiesen vnd außgerostet / werden auch ob Gott wil hinfort dieselben nicht dulden noch leiden.

Hie deucht mich schon / ich sehe die Schwärmer toll vnd rasene werden / vnd sprechen : Ey sol man solch ding schreiben / vnd so viel Kirchen in Deutschland / Frankreich / Engelland / Schottland / Niederlande / Polen verdammen / den Pappst erfrewen / vnd sonst allerley zwietracht hin vnd wider vnter den Leuten anrichten / das ist der Glaccianer Getrieb / die gern wolten ein new Pappsthum anrichten / vnd alles im Geistlichen vnd Weltlichen stand regieren / einen Fuß auff dem Predigstuel / den andern auff dem Nhatause haben.

Antwort :

Wir hören den Vogel wol singen / vnd das ganze Werck der friedfertigen mit dem alten Caluinischen Tact / calden / vnd vnseglichem schlagen vberschreyen. Aber es hat Gott lob vnd danck nicht noch. Denn :

Was sie mit dem wörtlein Glaccianisch meinen / das hat der fromme vnd frommliche Churfürst Herzog Augustus heiligster Gedechtnis wol erfahren / da man im alle trewe / fromme vnd eyferige Prediger vnter dem Namen Glacci hat verdeckt gemacht / das seine Churf. G. auch endlich gesagt : Wanns also gemeinet sey / so wolle

Caluinischer Hammerschlag.

so wolle sein Churfürstlich Gnade selbst Flacianisch sein. Wir wissen Gott lob wol / wer Flacius gewesen / auch was er für einen schrecklichen Irthumb in der kirchen Gottes auff die ban gebracht / vñ stehen da der vnsern schrifften vnd bücher / die des Flacij gewor- el von der Erbsünde tapffer vnd gewaltiglich widerlegen / In mas- sen auch derselbe im Christlichen Concordienbuch / alldieweil er mit der ganzen heiligen Schrifft / Zehen Geboten / vnd Christlich- em Glauben streitet / verworffen / außgesetzt / vñ vnd verdampt worden.

Müssens derwegen G. D. befehlen / das vns die Schwerm- mer wider ihr Gewissen / Vnd so viel der vnsern ernstliche Protes- station Flacianisch nennen / vnd gedencen / wie Augustinus saget : *Qui volens detrahit fama mea, nolens addit mercedi mea.* Das ist / wie Christus saget : Selig seid ihr / wenn ench die men- schen vmb meinet willen schmehen / vñ reden alles vbel von euch / so sie daran liegen. Seid frölich vnd getrost / es wird euch im Himmel wol belohnet wer- den.

Wie sol man thun? Es war keiner auff der Welt / der mehr vnd mechtiger wider die Aufruhr / vñ vnd von dem Christlichen Stand vnd Obrigkeit schrieb / als Lutherus der treffliche Heldt / noch dennoch musste er ein Aufrührer sein. Elias der grosse Man Gottes hatte es gerne alles gut gesehen / noch dennoch musste er hö- ren / er were der / der Israel vnruhig machte. In der ersten kirch- en wurden den frommen Christen dreierley schendliche laster für- geworffen / 1. *Impietas in Deum.* 2. *Thyeste caena.* 3. *Oedipidis con- cubitus.* Christus selbst musste ein Samariter / Teuffelsbanner / vnd Beetzehübsch genennet werden.

Vnd lesset Gott dem Teuffel also seinen Brauch / vnd sei- ne lust wol büßen / auff das der seinen Freude im ewigen Leben desto grösser werde. Es möchten aber dennoch die Schwerm- mer

Caluinischer Hammerschlag.

sich selbst bey der Nasen ziehen/ vnd sehen/ wer *Servetus*, *Neuserus* vnd andere gewesen/ vnd wie gewalt sie Gott gelestert haben/ das sie freylich die Christliche Kirche mit viel besserem Gewissen *Seruetisch* vnd *Neuserisch* nennen moecht/ als sie vns *Flacianisch* nennen / Sonderlich weil *Neuserus* / ihrer Gesellen einer/ in massen Herr *Stephanus Gerlachius* / der heiligen Schrifft Doctor vnd Professor zu Tübingen / *Neuseri* Handschriefft bey sich hat/ selbs geschrieben/ das keiner zu vnser zeit *Arrianisch* worden/ er sey denn zuuor *Caluinisch* gewesen / als *Servetus*, *Blandrata*, *Alciatus*, *Franciscus*, *Davidis*, *Gribaldus*, *Silvanus*, vnd andere/ vnd wer nicht wol *Arrianisch* werden / der solle sich hüten für dem *Caluinischen* Schwarm.

Aber wir befehlen das alles Gottes Gerichte/ vnd mag der Teuffel Gott so lange lestern/ als er wil/ vnd Gott verhenget/ wir wollen mit im nichts zu schießen noch zu schaffen haben.

Vnser Lehre vnd Glaube/ Gott lob/ gibet niemand zu dem schrecklichen Irthumb *Flacii* von der Erbsünde anleitung/ wie nach außgang *Neuseri* der *Caluinische* Schwarm zu dem *Arrianismo* vrsach gibt.

Wir verdammen die Kirchen in Deutschland / Franckreich / Engelland / Schottland / Nederland / Polen / gar nicht / sondern die schwermer / die in denselben kirchen viel fromme Christliche herzen von Gottes wort auff irwege / von Gott zum teuffel / vom ewigen Leben ins ewige verdammnis abführen wollen / wissen auch wol / das noch viel fromme Christen in Franckreich / Engelland / Schottland / Nederland / Polen / etc. sind / Vnd bitten Gott / er wolle dieselben mit vns / vnd vns mit ihnen / als seine Creatur / brüder vnd Tempel gnediglich führen / regieren / trösten / vnd erlösen / Vnd endlich seine Herrligkeit vns im ewigen leben sehen lassen.

Es ist aber hewer nicht new / das die schwermer allerley böser stück vnd tück sich gebrauchen / damit sie nur grosse Königreich / Chur vnd Fürstenthumb / Kirchen vnd Schulen verführen mögen /

Caluinischer Hammerschlag.

mögen/ vnd darnach fromme Lerer/ die sich wider ihre Practicken
setzen/ beschuldigen / als verdammen sie grosse Königreich/ Chur
vnd Fürstenthumb/ Kirchen vnd Schulen. Caluinus schrieb an
einen: *Vide modo, ut concilias nobis aulæ Germanicæ, Mache*
vns die Deutschen Fürsten nuhr zu Freunden. Zwingel schreibt:
Non præteribunt tres anni: Quin Italia, Gallia, Hispania, Germaniæ
pedibus in nostram iuerint sententiam. Es würden nicht drey
Jahr vergehen/ würde Welschland/ Franckreich/ Hispanien/
Deutschland/ alle Zwinglisch werden. Da das gesprech zu Mar-
purg gehalten worden/ brachten sie baldt ein Geschrey aus/ Luthes-
rus were Zwinglisch worden/ Da die *Concordia Anno 36.* zu Wit-
temberg auffgericht/ beredeten sie die Leute/ sie weren nicht zu Lus-
thero/ sondern Lutherus were zu ihnen getreten. *Danaus* nennet
die lutherische *Exegesis* zu Wittenberg außgangen / *Saxonicam*
Exegesis/ gleich als were dieselbe mit wissen vnd willen hoher D-
brigkeit zu Sachsen/ Kirchen vnd Schulen gestellet worden/ da
doch dieselbe alle ein herrlichs mißfallen darane gehabt. In sum-
ma / die Schwärmer können des guten nicht erwarten / es mag
leichtlich ein Windlein kommen / etwa von einem Schwärmer
aus seinem Gehirn im zugeblasen/ da bringen sie es auffß Papi-
schreyen vnd schreiben dauon in Vorreden/ verheissen inen Güt-
dene Berge/ singen *victoria, victoria, victoria, Sieg / Sieg /*
Sieg/ da sie noch weder hölzerner Berge haben/ noch den Sieg er-
lange.

Wolan / man mus ihnen ihre *somnia amantium*/ vnd ver-
gebliche Freude vnd Hoffnung lassen / dieweil sie je keine bessere
haben/ noch haben sollen. Das Volck redet von nichts denn von
Bänden/ Fürchtet euch jr aber / sagt Esaias zum g/eubigen/ nicht
also wie sie thun / vnd lasset euch nicht grawen/ Sondern heiliget
dem H/Ern Zebaoth/ den lasset ewer fürcht vnd schrecken sein/ so
wird er ewer Heiligthumb sein. Seid böse jr Völcker / vnd gebet
die flucht/ höret ihr alle/ die ihr in fernen Landen seid/ Beschliesse

Caluinischer Hammerschlag.

einen Rath/vnnd werde nichts draus/ beredet euch/ vnd es bestehe nicht/ Denn hie ist Immanuel.

Den Bapst erfrewen fromme Lerer nicht/ ob sie gleich den Sacramentschwarm nicht billigen/ sondern sie erfrewen Gott/ vnd betrüben den Teuffel. Im fall da sich gleich die Papisten darüber freweten/ Was dienet das zur Sach? Christus hatte zwölff Jünger/ der eine aus ihnen Judas wurde zum Berrether seines HERN. Dessen sind ohne zweiffel alle Phariseer/ Schrifftgelereten/ Saduceer/ Eltesten im Volck/ Iha alle Teuffel höchlich erfrewet. Solten nu die andern eilff Jünger auff gut schwermerisch gedacht haben/ Siehe doch/ alle Phariseer/ Schrifftgelerten/ Saduceer/ alle Teuffel frewen sich/ das einer aus vns den HERN verrathen/ wir wollen solche Teufflische freude zu Wasser machen/ vnd Judam in vnser Freundschaft nehmen/ oder selbst Berrether werden/ wie Judas? O nein/ das were ihnen nicht zurathen gewest/ denn also hetten sie des Teuffels vnd der Papisten damals in Jerusalem frewd nur grösser gemacht/ Gott aber vnd Christum mehr betrübt/ Darumb haben sie es auch nicht gethan/ sondern sich von ihnen abgesondert/ vnd seinen schendlichen Tode öffentlich der Kirchen vnd allen Christen zur warnung fürgehalten/ vnd auffgeschriben/ vnd einen andern durchs loß Matthiam an seine stat erwehlet. Wir zwar bezeugen für Gottes Angesicht/ das wir mit allen frommen Christen herzlich gern/ Christlichen Frieden vnd Brüderliche liebe halten wollen/ Wissen auch leider wol/ das der Teuffel ober dem Gezeck seine freude vnd gelechter hat. Diueil aber die Widersacher Christum vnsern HERN vnd Praeceptorn schenden vnd lestern/ vnd nur ein Bubenlied bey vns suchen/ So können wir fürwar ihre Lehre nicht billigen/ viel weniger zu ihnen eretten/ alldiueil wir wol wissen/ wir werden Papistisch oder Schwermerisch/ so ist dem Teuffel eine freude vnd gelechter/ Wir wollen aber Christum lieber ehren/ denn den Teuffel erfrewen/ des wird vns niemand verdenecken. Wer Christum vnd
sein

Caluinischer Hammerschlag.

sein Wort liebet / ehret vnd fürcht / der ist frommen Herzen ein lieber Bruder / Wer aber Christum schmehet / der ist vor frommen Herzen ein Grewel.

Nie kommen nu die Schwärmer hei vnd weisen vns einen Reichstag / auff welchen die Lehre so Doctor Luther in seinen Lehr vnd Streitschriften / mit Gottes wort erkritten in der Augspurgischen Confession / Schmalkaldischen Artikeln / grossen vnd kleinen Catechismus Lutheri / vnd im Christlichen Concordien Buch / von Röm. Keyserlicher Mayestat / Chur vnd Fürsten / vnd andern Stenden des heiligen Reichs / wie ihre der Schwärmer Lehre verboten / außgefasset vnd ausgeschlossen worden / Aber sie werden solches in ewigkeit nicht thun können. Gott beware vns in dem wort seiner Lippen verfasset / für dem Werck außser dem weg des Mörders / Amen.

II.

Ecklich ist auch vnwidersprechlich / das man einen jeden vrtheilt nach seiner eigenen Aussage vnd bekandtnis. Denn wer selbst heimlich zu verstehen gibt / oder mündlich aussaget vnd bekennet / das er seiner sachen nicht gewis ist / der darff nicht viel oberweisens vnd vberzeugens / er wird geachtet nach seiner eigenen aussage / sonderlich wenn man vmb bessern berichts willen nachfraget / vnd erschret / das sich die Sach anders nicht verhalte / als des verdecktigen eigene aussage lautet.

Nu sind verhanden der Schwärmer eigene Bekandtnissen / damit sie ja frey öffentlich für aller Welt bekennen / vnd bezugen / das ihr Schwarm nicht Gottes Wort / sondern lauter Menschenen Thandt / vnd ein erkandter vnd bekandter Irthumb sey / Vnd sind dieselbe Bekandtnissen fürnemlich zweyerley / Etliche *implicita* / das ist / dunckele / heimliche / vertuschete / Vnd *explicita* / helle / öffentliche / auffrichtige.

Erstlich / sind dunckele / heimliche / vertuschete Bekandtnis /
damit

Caluinischer Hammerschlag.

Damit die Schwärmer ihre Sache aller Wele/ als böse/ nichtig/
vngewis/ vnd lesterlichen vor die Augen stellen / vnd derselbe sind
ihr viel vnd mancherley faule/ lose/vnredliche/ Teuffelische/böse
stück/vnd Practick / damit sie ihren Schwarm wollen fortsetzen.
Denn:

Erstlich sind sie in ihrer Meinung mit einander nicht einig/
sondern spaltig / also / das / wo eines Meinung war ist / so kan des
andern nicht bestehen. Denn Karlstadt hat seine Gauckley ge-
sucht in wörtlein *DAS*. Zwingel in *IST*. Decolampadius in
wörtlein *LEIB*. Caluinus hats gedeutet von dem Leibe Christi.
Der zwar droben im Himmel sey / aber mit dem Glauben verstan-
den werde. Zwingel sol das Wörtlein *WELCHER* (welcher
für Euch gegeben ist) so viel heissen / als so fern / *Quod id est
quale*. Etliche sprechen / Die Wort *Esset* vnd *Trincket* / sollen/
das Brodt vnd Wein belangende / heissen / *Esset* vnd *Trincket* mit
dem Leiblichen Mund / Den Leib aber vnd das Blut Christi be-
treffend / sollen sie so viel heissen / als glaubet / vnd beweisen solches
aus dem sechsten Capitel Johannis. Caluinus aber spricht / Das
sechste Capitel Johannis könne vom heiligen Abendemahl nicht
verstanden werden / Andere sprechen / Die Wort *Esset* vnd *Trin-
cket* / gehen gar nicht auff den Leib vnd Blut Christi / sondern nur
auffs Brot vnd Wein. Ein ander schreibt / *Nihil refert siue adsit
siue absit corpus Christi, parus ille Sacramentum eius semper est id
est sacrum signum, &c.* Das ist / Es ist nichts daran gelegen / der
Leib Christi sey da oder nicht da / es ist doch das Brodt allzeit des
selben Sacrament / das ist heiliges Zeichen.

Zum andern / das sie die Augspurgische Confession verklei-
nern / wie sonderlich die Newstedter neun vrsachen anzeigen / war-
umb nicht viel von derselben zu halten / Vnd ein junger / frecher /
thollkühner Schwärmer Kleinwig / hat dieselbe *Erraticam confes-
sionem. & quintum Evangelium*, das ist eine irrige Bekandnis /
vnd das fünffte Euangelium spottweise genennet.

Bum

Caluinischer Hammerschlag.

Zum dritten/das sie bald den Sacramentsstreit/nur für wortgezencf achten / Als Petrus Martyr / vnd sonderlich Buccerus allezeit fürgegeben / vnd ihr noch viel die Leute bereden wollen: Baldt die Tauffe vnd das heilige Abendmal / von den vnsern die frigen nicht wollen empfangen lassen / wie Petri Martyris Epistel an eine Kirche in Engellandt außweiset / vnd die Zürcher Anno 44. ihre Kinder zu Strassburg nicht mehr zum Sacrament wollen gehen lassen.

Zum vierden/das sie irer Lere nicht gestendig vnd bekande sein / sondern sieben / zehen / oder wol achzehen Jahr im Busen tragen / biß sie entweder *brachium seculare* / weltliche gewalt an sich gezogen / oder sonst frey für den schuss sein / wie die historia Kleins witz zu Heidelberg / Alberti Hardenbergis Thumprediger zu Bremen / vnd etlicher Wittenbergischen Theologen / im Churfürstenthumb Sachsen außgeweiset / vnd noch jmerdar außweisen.

Zum fünfften/das sie viel Schandbücher vnd Landsügen schreibe / vnd doch irer namens sich schemen / oder frembde vngewer vnd vnerhörte namen inen antichten / Als denn solcher Bücher er vnd Schmeckarten viel in vorigen Jahren vnd noch / herum geflogen sind / vnd fliegen / Als sanderlich wider die *formulam Concordia* / vnd dazu gebrauchten Theologen.

Zum sechsten / das sie trewe Lerer vieler Irthumb beschuldigen / vnd solches gemeiniglich nach frem Todt / da sie nicht antworten können / auch aus etlichen Sacramentschwerner machen wollen / wie den Schwebischen Theologen / Luthero / Hesshusio / vnd vielen geschehen / vnd noch geschiehet.

Zum siebenden / das sie trewer Lehrer Bücher wider Gott / vnd die erbare Welt verfalschen / vnd ihre Irthumb drein fliecken / Dargegen was wider sie ist / außstraken / in massen sonderlich in Lutheri Kirchen Postill vnd Catechismo / vnd D. Pommers Psalter zu beweisen.

Zum achten / das sie nie gerade zugehen / sondern Gott vnd
G der

Caluinischer Hammerschlag.

der wekt gar zu klug sein/ vnd die sachen also angreifen/ das/ was
wol geredt/ vnd der Ausgang gut ist/ sie die sein/ die solches
aufgerichte/ Wenn aber der Ausgang böse/ ist niemand da gewes-
sen/ vnd sie allezeit die frommesten bleiben.

Zum neunten/ das sie allezeit/ wo sie einnisteln wollen/ ei-
lich mit *generaliteten* spielen/ das niemand weiß/ obs zu guten or-
der bösen gemeinet sey/ biß sie die Oberkeit betrogen/ vnd die Ein-
seitigen berückt/ da plagen sie heraus/ vnd lassen die woiffesklawen
sehen.

Zum zehenden/ das sie mutwillig/ vnd wider ir eigen gewissen
aus Lutheri vnd vielen andern Schrifften etliche Wort zwacken/
gleich als würde dadurch ihr Schwarm gestärket vnd bestetiget/
welche do h im Text/ wenn derselbe recht angesehen wird/ ganz wis-
der sie/ offte gar von etwas anders lauten/ vnd zuuerstehen sein.

Zum elfften/ das sie zwen Zunge/ Halbmäundige/ zweiffel-
hafteige/ schlipfferige/ vngewisse wort brauchen/ vnd nit recht her-
aus wollen.

Zum zwölfften/ das sie allerley fliegende vngewisse geschweß
für Heiligthumb aufffangen/ vnd in Druck verfertigen/ als son-
derlich einer schreibet / Doctor Justus Jonas habe zu Halle An-
no 47. etlichen Schweizern den gebrauch des H. Abendmals ge-
stattet/ vnangesehen/ das sie es mit ihm nicht gehalten. Item/ der
Churfürst zu Sachsen werde auch bald zu ihnen treten.

Zum dreizehenden/ das sie allerley Vnsug/ streit vnd ver-
wirrung anrichten/ vnd darnach trewe/reine Prediger schenden/
vnd schmehen/ vnd/ als zeneckische/ stolze/ hoffertige Köpffe auf-
ruffen/ wenn sie sich inen widersehen. Solche vnd dergleichen mehr
böse Stück/ sind ein gewis Zeugnis/ das sie nicht die rechte Lehre/
sondern von allen trewen Lerern auff allen Reichstagen vnd Col-
loquijs/ vnd von vielen hohen Personen/ ja viel mehr von G. Det-
selbsten verworffen vnd verdampfen Schwarm verfochten vnd
foresehen wollen. Denn der heilige Geist braucht zu forschung
Gott

Caluinnischer Hammerschlag.

Gottes Wort nicht Narrentheidung/lose böse Mittel/Teuffels
vnd Menschen tande/ Unchristliche Practicken / sondern handelt
frey öffentlich / vnd gehet auff rechter strassen / redlich / erbartlich /
vnd gleich zu / der Teuffel aber tückel vnd bückel sich / schleicht /
kriecht / leuge / treuge / Vnd in summa handelt als ein vnredlicher /
tückmeuffischer Geist nicht redlich. Das ist gewis vnd einmahl
war. Wil man die Warheit bekennen / vnd die Christliche Kir-
che von G D T vnd seinem Wort vnterrichten / so thue mans
frey öffentlich / vnd gehe nicht so mit vnredlichen Stücken vmb.
Denn wer Arges thut / der hasset das Liecht / vnd
kämpft nicht an das Liecht / auff das seine Werck nicht
gestrafft werden / Wer aber die Warheit thut / Der
kämpft an das Liecht / das seine Werck offenbar wer-
den / Denn sie sind in Gott gethan / Johann. 3.

Zum andern / So sind noch vorhanden etliche öffentliche /
helle / auffrichtige Bekendnis der Schwärmer / damit sie ihre sa.che
der Welt / als böse vnd lesterlich fürstellen / vnd zu erkennen geben /
Denn Carlstadt der erste Feind zu vnser zeit / hat seine lehre nicht
aus Gottes Wort geschöpfft / sondern / wie er selbst geschrieben /
Es ist ihm ein Man erschienen / der hat sine solche Meinung vom
Sacrament geoffenbaret / welcher seinem fürgeben nach der Him-
lische Vater sol gewesen sein.

Darauff Lutherus Tom. 3. pag. 68. im recht gesagt / Es
sey nicht der Himlische Vater / sondern der Teuffel gewesen / wie
denn bald hernach in seinen Rottgesellen die Himlischen Pros-
pheten sich gnungsam erwiesen / wer mit ihnen habe pflegen Ge-
sprech zu halten / nemblich der Geist / welcher war ein Lügner von
anfang.

Anno 25. hat obgedachter Carlstad an D. Lutherum geschrie-
ben / er habe das jenige so er von des H. Ern Abendmal in Druck
hette außgehen lassen / nicht *definiendi* / das ers also für gewis

G ij

hielte /

Caluinischer Hammerschlag.

hielte/ geschrieben/ sondern wie man pfleget von einem dinge zu dis-
putiren/ wenn man die warheit erforschen wil.

Wie auch Zwingel der andere Sacramentsfeind auff seiner
schwarm gerathen/ davon schreibet er selbst in seinem *subsidio Eus-
charistie* / das er nemlich einen Traum gehabt / als er sich mit
dem Schreiber/ der ihn zuvor/ da er vor dem Rath von der abtil-
gung der Messe / vnd anordnung des Abendmals gehandelt/ hat
widerstanden / widerumb vnd mit vberdruß zankete/ vnd ganz
stum werden muste / vnd im nichts antworten kondte/ Vnd da er
sich ihm Traum also bey der nacht geengstiget / da habe ihm ges-
dauert/ es stünde ohn gefehr bey im ein Man/ der ihn erinnert/ (ob
derselbe/ sprichet Zwingel/ schwarz oder weis gewesen/ könne er nit
wissen) vnd gesprochen: Antworte klerlich / wie im andern Buch
Mose am 12. steht: *ES IST DER DURCHGANG DES HERRN.*
Est phase Domini. Da er nu dis Gesicht sehen/ vnd erwacht/ sey er
mit freuden aus dem Bette gesprungen / vnd solchs baldt für der
ganszen Kirchen öffentlich geprediget.

Deßgleichen hat Zwingel an Mattheum Alberum geschrie-
ben: *Nos nostra proferimus, ut conferamus, non ut conseamus.* Wir
bringen das unsere herfür/ nicht/ das wir gewis dafür halten/ son-
dern das wir vns dauon wollen bedencken.

Decolampadius der dritte / da die disputation zu Bern hat
sollen angehen/ hat er in seiner kammer gebetet: Herr Gott ist vns
ser lere recht/ so gib gnade dazu. Solchs hat *M. Ioannes Cancellarius*
zu gehöre/ vnd sich darüber verwundere/ das Decolampadius noch
so vngewiß were/ vnd derwegen von diesem Schwarm/ dem er zu-
vor zugethan gewesen/ abgestanden/ vnd zu den vnsern sich begeben.

Eben dieser Decolampadius hat an einen seiner guten freunds
de geschrieben: Bitte den HERRN / das er deine Augen auffschue/
oder / so ich irre/ meine eröffne. Item / Decolampadius hat zum
Landtgraffen gesagt: Ich wolt das mir meine rechte handt were
abgehawen worden / ehe denn ich einen einigen Buchstaben/ oder
Gloss

Caluinischer Hammerschlag.

Gloß vom Abendmal wider D. Luthero/der gleichwol den Text
vnd die Wort Christi behele / geschrieben habe. Solche wort hat
Petrus Plateanus am Hessischen Hofe/ neben vnd mit vielen an-
dern gehöret/vnd D. Luthero vnd andern frommen fürnehmen Leu-
ten erzehlet.

Wie auch Bucerus/ Capito/vnd die andern fren irthumb An-
no 30. zu Wittenberg widerruffen/vnd hinfort mit D. Luthero ei-
ne lere bey den frigen zu führen/bewilliget/das ist droben angezeigt.

Aus diesem allen haben alle frome Herzen zuuernemen/das die
fürnemstem vnd Rädelsfürer dieser Secten freilich müssen wider
vnser in Gottes wort wolgegründete/vnd im H. Reich approbirte
vnd bekandte lere mitwilliglich sich gesetzt/vnd also von ime selbst
als heimlich vnd öffentlich erkandte irthumb vnd lesterung wider
ir eigen gewissen vertheidiget haben. Denn es spricht ze der heilige
Paulus nicht: Also hat mir ein Man gesagt/ der mir erschienen/
also ist mirs im Traum fürkomen/ Ich wil euch vom H. Abendmal
predigen/nicht das ichs also für gewis achte/ sondern das ich nuhr
etwas mit euch dauon disputiere vnd rede/ vielleicht hat mir Gotte
den rechten verstande noch nicht gegeben: Nein also redet Paulus
nicht/sondern spricht: Ich habs vom H. Erren empfangen/
das ich euch gegeben habe. Vnd worauff D. Luther mit
seiner lehre gestanden/ das weist sein Büchlein/ dem er den Titel
gegeben: Das die Wort Christi (Das ist mein Leib) noch fest stes-
hen. Bey solchem einigen Grunde der Einsetzung Christi bleiben
auch wir/vnd sind gewisser zuversicht/ das vnser Herz vnd gewis-
sen Christus vnd sein Wort / nicht wird betriegen können/ob wir
gleich nicht verstehen/wie es könne zugehen/ das ein Leib an vielen
orten sey. Ach wie sein herzlich vnd Christlich ist/wenn ein mens-
che in anfechtung / oder auch letztem Todesständlein zu seinem
H. Erren Christo sprechen kan: Ach H. Erre/also hastu gesaget/thure
nhur nach deinem wort: Mein Herz hele dir dein Wort für/dar-
umb kanst vnd wirstu mich nicht verlassen. Da ist vnser will Gots

Caluinischer Hammerschlag.

ees will/ vnd ist der Herr Christus sein bey vns in der Noth/ vnd nimpt vns endlich zu Ehren an / Denn er ist gerecht/ vnd mache sich zum willen allen denen / die in fürchten.

Dagegen/ was kan für Trost/ für gewisheit/ hoffnung/ vnd leben sein/ bey einem Menschen/ der Gottes wort aus den Augen gesehet / vnd nuhr nach seiner Vernunfft den Heiligen in Israel mustern / vnd meistern wollen. Freilich wird es da heissen/ wie Leo gar schön sagt: *Frustra ab illis Amen dicitur, à quibus contra id, quod dicitur, disputatur.* Es saget ein Mensch ganz vergeblich Amen/ der wider das / das G Dc redet / disputiret. Vnd der Herr Philippus sagt in seinem Büchlein *de sententijs patrum*: Es mag wol sein/ das der andern (der Zwinglianer meinung) vnersuchten/ sichern herzen baß gefelle / Darumb das sie sich sein mit der Vernunfft reimet / vnd mit subtilen Argumenten auffgemuret ist. Aber es wird eigentlich den stich nicht halten/ wenn die ansechtung vnd das Gewissen kommen / vnd sie fragen wird/ Was für gründe sie haben/ das sie von der rechten meinung / auff eine neue vngegründte / irrige Opinion gefallen sind. *Tum verba, Hoc est corpus meum, erunt fulmina.* Da werden denn aus diesen worten/ (Das ist Mein Leib) citel Donnerschlege werden/ welche das herz also zu engsten vnd zuschlagen werden / das in die Welt zu enge darob sol werden. Denn was wil ein verzagtes blödes Herz wider diese Donnerschlege auffbringen? Welcher spruch/ Welch Wort G Dces wird sie da gewis machen können? etc. Ich hab es versucht/ vnd weis es / wie gar keinen stich in der not vnd ansechtung solche lehre halten möge/ so wider das Wort Gottes fürgenomen werden / sie scheinen gleich wie sie wollen/ etc.

Also ist nu gnugsam erwiesen/ das der Sacramentschender oder Caluinischen oder wie mans kennet/ schwarz/ ein erkandter vnd bekandter Irthumb sey/ vnd derwegen von allen trewen Lehrern vnd Predigern zu straffen/ auch von allen frommen Christen zu meiden vnd zu meiden. Die Türcken/ Antitrinitarier/ Papisten/ Schwärzer

Caluinischer Hammerschlag.

Schwendfelder/Widerteuffer/etc. werden öffentlich vnd mit namen gestrafft/die doch/ Gott lob vnd danck/ in vnsern Kirchen nit vermercket worden. Istis nu recht/ vnd Gottes ernstlichem befehl gemess/ das man weit abwesende Schwärmer vnd Keger öffentlich straffe vnd verdamme: Warumb solt es auch nicht recht vnd Christlich sein/das die Sacramentschender / die vnser Zuhörer irre machen/ vnd verführen/ vnd an allen örten/wo man zusammen kömpt/ von Christi Lehre vndd Ehre / vom Wort/Taufe / vndd Abendmahl schimpfflich / vnstetig/ vnd lesterlich reden/ vnd in vnser Kirchen kommen / nicht das sie lernen wollen/ sondern das sie hören/ vnd ein Liedlein dauon machen/ öffentlich vnd mit nahmen straffen? Traun / sollen die Caluinisten nicht gestrafft werden/ so können weder Türcken/ Widerteuffer/ Papisien/ Epicurer/ Buscherer/ Zerberer/ Ehebrecher/ noch andere Gottlose gestrafft werden. Vnd wird also dem H. Geist/ vnd allen trewen / ernstlichen/ eiferigen Predigern ein grosses / vndd in diesen letzten Hesen der Welt/das aller nötigste stück ihres Ampts/das Straffamt benomen/ Denn se Gottes Wort nicht allein zu Lere/zur Besserung/ vnd züchtigung in der gerechtigkeit/sondern auch zur straffe gegeben/das ein mensch Gottes vollkommen sey/ zu allen guten Wercken geschickt/ 2. Tim 8. Es stehet auch der Christlichen Kirchen nit zu rathen/das sie in irem Busen wissenschaftlich Schlangen trage/ auffziehe/werme/ vnd erhalte/ die hernach/ wenn sie erwachsen/ vndd lufft kriegen/ der Kirchen alles Herbleid/ Wehe vndd angst zufügen/ vnd die Mutter mit den frommen Kindern ausslossen/ vndd den greuel der Verwüstung an den heiligen ort setzen.

Dir HErr Jesu Christe/ warer Gott vñ Mensch/
Allmechtig vnd barmherzig/ sey lob vnd Ehr für alle
deine vnaussprechliche wolthaten / erhalte vns in
deiner Wahrheit / Dein Wort ist die Wahr-
heit/ Amen/ Amen.

Einleitung

Faint, illegible text, likely bleed-through from the reverse side of the page.











3/ 4483


ULB Halle 3
004 507 894



Sl







4
Hammer Schlag /

Das ist :

4
r einfeltiger
cramentischer/oder

n ein erkandter/ vñ bekandter
wegen von allen rechtschaffenen
entlich zu straffen/ auch allen
n/als den Teufel selbst/
vnd zu meiden.

mans Sacramentie

schen/ob Lutherus vnd Phi
sten vñ Sacramentischer geschrie
erworffen vnd verdamet haben.
Durch

FORCHEIMER VM
tanum Francum.



u Christlingen.

9 2.